

蘇州府志



廿五

卷之六十一 人物十七	卷之六十二 人物十六	卷之六十三 人物十三	卷之六十四 人物十一
---------------	---------------	---------------	---------------

三二	一四	九〇八	漢書門
冊架	函號	類	


元九	九〇八	內閣文庫
二〇	三八三	番號 漢 9083
七二	三三	冊數 32 (25)
架冊號		函號 292 13





蘇州府志卷第六十一

人物十五 常熟縣 新分昭 文縣人物附後



商

巫咸周書君奭篇曰在大戊時則有若伊陟臣扈格于上帝巫

咸又王家書序曰伊陟相大戊亳有祥桑共生于朝伊陟贊

于巫咸作咸又四篇越絕書云虞山巫咸所出也

巫賢君奭篇曰在祖乙時則有若巫賢孔安國傳云賢咸子巫

氏史記正義云巫咸及子賢冢皆在海虞山上

周

言偃吳人字子游少孔子四十五歲既已受業為武城宰習於

文學史記唐開元中追封吳侯宋政和中封丹陽公淳熙中改封吳公

國朝康熙五十一年

賜其七十三世孫德堅五經博士世襲

縣志陸澄吳地記云常熟縣北一百九十步

有言偃宅樂史太平寰宇記云宅在常熟縣西北一百步朱子吳公祠記云此縣有巷名子游橋名文學相傳至今圖經又言故宅在縣西北而舊井存焉今雖不可復見而公為此縣之人不誣矣

唐

龔景才字敦禮慶元志曰景才縣人也五世同居以孝義稱麟

德九年

當作元年

旌表門閭至宋其子孫多居小山景祐四年有

龔沂者登進士第景才之裔也嘗知瓊州瓊山縣終於奉議

郎琴川志

宋

陸縮字權叔常熟慶安人本名絳字伯厚見前史同姓名者不

道更今名舉進士第歷知揚子雍邱二縣終朝奉郎尚書職

方郎充淮南等路制置發運司運鹽公事卒於真州官舍贈

中散大夫縮讀書務通理道著書必本經昆弟分產推先疇

付之捐俸振族教孤姪如其子臨吏嚴而字民加卹所歷郡

縣專摧治豪右懾服強禦所著春秋新解三十卷歌詩尤膾

炙人口嘗提舉江淮茶稅蘇洵贈之以詩盧志

張僑字安道縣人有聲場屋間嘗作月中桂詩膾炙人口登皇

祐元年進士第因言事謫衢州終於朝散郎尚書都官員外郎同年趙清獻抃遊從極厚詩筒往來觀其友足以知其人矣子顏孫敏功四世孫攀皆登科

琴川志

陸徽之字彥猷常熟人祖景字伯通景祐初及第官至太常博士徽之由太學上舍生免殿試賜同進士出身終漢陽主簿高才博學衆推爲鄉先生出其門者如陳起宗張柵錢觀復皆爲顯人徽宗卽位詔求直言徽之廷對與雍孝聞輩力陳時政闕失唱名日有旨駁放孝聞立殿下叩頭曰陛下求直言有云言之者無罪今詔墨未乾奈何以直言罪人衛士怒以柱斧撞其頰數齒俱落大觀末彗星見始復收錄時孝聞

已不能語止賜六字道號居神霄宮徽之欲赴京師已卒孫

端成字天錫就特奏恩

中吳紀聞
參盧志

陳起宗字興祖少入上庠連冠多士一日歸省屬同舍生爲投試卷起宗業禮記同舍嫉之易以周禮迫試乃告起宗遂用周禮試復第一登政和五年進士第四年三十七以徽猷閣待制知并州卒起宗善談辨詩篇灑落有陶謝風韻

盧志

錢觀復字知原於吳越爲疏屬由太學登進士乙科常熟土著及第自觀復始初調諸暨主簿改温州教授終任更瑞安時方臘猖獗觀復贊邑令王公濟備禦流民歸瑞安相屬於道或議驅出境觀復曰孰爲吾境迫之適資盜耳遂徙海洲居

焉調湖州戶曹同郡朱勔勢方盛以鄉人故願妻以女辭不
就授衢州判官敵騎犯浙衢當要衝觀復白郡守縱民老弱
皆出戶畱一丁不畱與畱而疲弱不堪任者罪如軍法旣而
諸兵欲乘時爲變顧城中子女無所獲乃止除國子監丞改
諸王宮教授太常丞秘書郎戶部員外郎出知廣德軍歲上
供民輸送回遠加斂水脚錢請於朝寄廩湖之四安至國門
纔五日費減大半郡中殺牛祭張王祠嚴爲條禁所活甚衆
觀復深於易理急於爲義鄉里推之自號正靜居士卒年六
十五官至朝散郎金紫光祿大夫有文集十五卷論語解二
十卷子侯字廷碩一字惟大弱冠舉於鄉考官徐良能見其

文有本原意必宿儒以爲選首乃侯也大驚異之繼補太學
生登紹興進士乙科授泰州教授除太學正從容學省斂以
靜退人莫窺其際改宣教郎宗正寺簿太府寺丞宗正丞丐
外知袁州除著作佐郎遷將作少監請祠除福建路提舉終
朝請郎侯寡嗜欲惟藏書數千卷朱墨精謹皆所親校尤邃
於易有文集五卷諸經講解十卷易說三卷弟佃字仲耕弱
冠入太學擢進士第授分水尉池真二州教授改諸王宮大
小學教授遷大宗正丞通判太平州乾道七年詔皇太子領
臨安尹慎擇僚案佃自外任選爲推官擢吏部郎中對便殿
言三事上稱善累遷權吏兵工三部侍郎出爲江西路轉運

蘇州府志 卷六十一 四
副使時盜賴文正起武陵朝廷調兵討之佃餽餉不乏繼使
福建再使江西奏蠲諸路之逋淳熙八年婺州饑且缺守上
曰錢佃可守郡既至禱雨鬚髮爲白勸分迨粟所活口七十
餘萬政甲一路提舉朱仲晦與陳亮書云婺人得錢守比之
他郡事體殊不同及作江西漕司養濟院記謂其嘗奏免贖
吉麻租二千四百五十九斛兩州之人尤歌舞之婺州救饑
之政亦爲諸郡最佃忠信篤厚根於天性臨政不求赫赫聲
恒以字民爲先務捐橐裝買田合族名曰義莊官至中奉大
夫秘閣修撰有易解三十卷詞科類要二十卷文集二十卷

盧志

張柟字材仲由三舍法貢京師入太學治書有聲政和五年進
士第初調臨江軍司刑曹事知嚴州遂安縣方臘叛擁兵入
邑丞簿皆遇害柟獨力戰不敵刃中脇擁入巢穴柟曉以逆
順卒不敢加害臘既伏誅改知歸安縣臨安府通判知泰州
鎮江衢州皆以惠愛稱柟性純孝在衢時母卒年九十九柟
亦七十矣執喪甚至初得郊恩捨子予姪族人有喪不能舉
者哀而葬之官至左朝散大夫卒年七十八贈正議大夫盧志
鄭時字是翁縣人樞密馱之後登宣和六年進士第知當塗縣
律身廉介撫民以寬訓諭不悛而後加罰民多化之秩滿通
判建康府畱守鼂謙之待以長者凡所贊畫言無不從以疾

奉祠歸終於朝奉大夫時天性嗜書至老不倦自左氏史記
東西漢三國志南北史以至韓柳杜樊川東坡諸文集皆手
鈔編錄下至稗官小說莫不經覽焉

琴川志

王伯廣字師德縣梅李人登紹興十二年進士第調德清尉既
歸里家產遜諸弟一毫不取試教官授温州教授再調常州
未赴卒年五十伯廣少工文從中書舍人楊邦弼學嘗過臨
安謁張倅材仲張曰試教官乎曰某素不習經張為指蹊轍
閱月以程文示張張大驚曰天才也即魁教官精於詩四六
亦為人膾炙與張孝祥游詩筒往復有聽雨集藏於家

琴川志

嚴煥字子文縣人嘗與同里錢南試聖人以人占天賦出場問

破題押何字南曰押占字煥曰余奪魁君第二果以首薦登
紹興十二年第調徽州臨安教授通判建康府知江陰軍遷
太常丞出為福建市舶終朝奉大夫煥長於書筆法尤精

志

琴川

冷世光字賓王常熟人與弟世修世南同入太學稱為三冷又
與世修同登紹興十八年進士第調歸安簿知歷陽寧國二
縣廣德軍教授改知龍游縣朱仲晦為常平使者旁邑令見
訴于民仲晦命世光體實遂得其情兩省交薦幹辦行在諸
軍審計司除監察御史遷殿中侍御史條奏忠切彈劾無所
避周必大獨相初除吏世光即論之施聖與以元樞出知泉

州亦遭劾罷人謂之冷面御史既而去國奉祠尋知嚴州句
 祠得請既又引年致仕作閒適堂優游里社泊如也年八十
 終朝奉大夫世光事親孝居喪哀與諸弟和於子孫蓋其教
 自其父通奉力賑施邑里世光兄弟率行之不替有奏議彈
 章若干卷東堂類稿二十卷刀筆五卷世修字良器由進士
 調崇德縣簿知州張瑜異之移攝理掾獄屢空隆興初知興
 化縣辟監行在北門外激賞庫改秩乞回一階封垂白之母
 上特命詞以寵之知上元縣民有骨肉互訟者世修委曲諭
 以恩義民感泣願息爭通判和州守尚嚴峻世修濟以寬秩
 滿吏民詣臺乞留知南康軍未上即丐祠歸作留耕堂以示

子孫卒年七十三終朝奉大夫有雜文三十卷詞科類要十

卷

盧志 右傳盧志元文皆本之琴川舊志今考宋史袁樞

傳樞遷大理少卿時通州民高氏以產業事下大理殿中
 侍御史冷世光納厚賂曲庇之樞直其事以聞人為危之上
 怒立罷世光以朝臣劾御史實自樞始然則志所稱去國奉
 祠殆諱之也因并錄之以見
 志乘之不可盡信類如此

趙公豫字仲謙自父少卿家常熟公豫幼聰警記左氏傳不謬

一字登紹興二十四年進士第調無為縣尉歷知仁和餘姚

縣高郵軍真常二州提舉浙東常平茶鹽除倉部郎官兼刪

修勅令官遷大理少卿差充接送伴金國賀正旦使遷太府

卿知太平州江東轉運副使進集英殿修撰開禧初引年陞

寶謨閣待制致仕嘉定五年卒年七十八公豫沈厚清苦平

居以清坐爲適無毫髮干州縣居官廉正常言吾求爲循吏不求爲健吏晚歲勇退識尚高遠有奏藁一卷燕堂類藁五卷弟公升公頤仕皆至麾節類有政績可紀

琴川志

趙思字再可其先洛人孝孫之猶子也孝孫字冲修建炎中避地來常熟思生甫三歲及長通春秋登紹興進士第調鍾離簿乾道中以丞相虞允文薦孝宗引見便殿問恢復大計奏對稱旨除大府寺簿太常丞兼度支郎官台州闕守上問大臣誰可任者僉以思對亟出御筆以授不數月翕然稱治上親書姓名於御屏除直秘閣淮南路轉運判官兼提點刑獄過闕辭上曰天台之政朕鉅細悉聞知卿忠實可仗就陞副

使除戶部郎官總領淮東軍馬錢糧未幾奏計遷起居舍人充金國賀生辰使及致詞北廷不肯稱御名金主以爲慢朝廷不得已罷之居八載有使北者言人間問趙運使安否不絕起爲廣西提刑改知湖州除直龍圖閣再任尋除起居郎權吏部侍郎奉祠再知靜江府廣西經略以職事修舉除秘閣修撰累轉中大夫卒年七十

盧志

陳字字伯愛古靈先生諸孫自宜興徙常熟以父臺簿遺澤爲莆田尉得劇賊格當霑賞字愀然曰吾其可藉人命爲自進之階卒辭之調紹興府司法隆興中改知富陽縣分差鎮江府糧料院知湖州提轄行在權貨務知房州歸卒年六十一

字孝友廉潔居母喪鬚髮盡白撫愛諸弟每食必同席俸祿不入私室家無金銀之器常自謂先世以清白遺子孫豈惟富不可求亦所不願也

琴川志

鍾璇字振遠一字叔齊縣人六歲而孤育於繼祖龍圖學士林適家適家多書因得縱觀與其孫璟環琢同肄業課率先成後璟兄弟並登第璇遂棄舉子業取所藏書盡閱之侍官天台一日遊巖谷間遇異人衣僧服手列禦寇書揖而與語坐磐石指一泓定水曰此水滔滔乃皇極大中之道語久別去自是有悟益不溺於名利放浪漁釣闢築室梅里所居多蒔香草自號藥圃隱居二十年家貧殊不戚戚有求者解衣分

粟無靳色唐瑑自畱守歸寓梅里遂為忘年交提舉徐誼吳守沈揆皆造其廬以奇人目之范成大等薦於朝不報卒年五十二有藥圃藁山中錄續孔白帖秦漢以來鍾鼎奇字藏

於家

琴川志

周容早失怙事母朱至孝為縣從事嘗有事於頂山得數粟附歸以奉母妻匿之以他粟進他日母出之以食容容心疑焉遂詬譴其妻尤好為義舉既卒邑人相與祀之

鄧韞常熟志按孝子生

於乾道間歿為神今最著舊府志不載今從縣志增入餘詳見祠廟及塚墓

張攀字從龍由太學登淳熙十一年進士第調鄞縣尉楚州教授知溧水縣嚴州通判監登聞鼓院慶元通判知興國軍除

將作監丞太府寺丞秘書丞詮次中興館閣書目凡萬四千九百四十三卷上之兼權右曹郎官除尚右郎官改尚左軍器監同日再命拜殿中侍御史兼侍講除起居郎兼崇政殿說書嘉定十六年卒年七十贈通議大夫集英殿修撰攀寬厚易直遇事開誠無一毫矯飾幼年羣試不肖隨衆減年爲欺家世清白持之益堅仕州縣以循良稱在朝廷以靖恭著有益齋文集奏議漢唐論共若干卷盧志

周甫字次山常熟人幼穎悟五歲誦論語每舉一字輒引類言之淳熙十年秋試主文郭頤取爲解魁以失書塗注太守耿秉移嗣榜首遂棄舉子業窮經史百家之書識見超卓文筆

凌厲操履益不苟參政宇文紹節館之以邊功累官不就縣

令孫應時甚愛重之精於漢史所著韓生傳章華臺記石頭

城歌等作皆膾炙人口

琴川志

富嘉謀字君美文忠公裔居常熟以祖澤仕調歸安尉無爲軍判官上猶縣令監行在省倉上界特旨勅處州慶元縣以才選知縣事再任臨安府通判建康分司權轄改行在權轄知饒州改知泰州淮西淮東運判知和州奉祠家居卒年七十七嘉謀才具素優臨政不苟居鄉尤急於義云

琴川志

周虎字叔子臨淮人靖康中徙居常熟爲人倜儻輕財尚氣慶元二年武舉進士第一授殿司步軍同正將除武學諭閣門

舍人充金國賀生辰接伴副使知光楚二州開禧二年知和州時金兵入寇圍和州甚急虎部分將士乘城拒守其母何氏擁孫息期與兒偕存亡虎謂父老曰吾國家守臣一朝去此則為奔亡之人失節敗名生不如死效死弗去雖歿猶生吾計決矣合戰凡三十四殺驍將十數最後射死其右帥石砣礎虜大創引去於是和議堅決江淮奠枕矣虎推功歸母進封永國太夫人故賞不及虎州人德之生為母子立祠特轉武功大夫正任文州刺史移廬州辭不就除主簿侍衛馬軍行司公事特授成州團練使侍衛馬軍都虞候帶御器械兼幹辦皇城勾閒提舉佑神觀言者指為權黨坐謫徽州得

旨自便復元官未幾母死誓不出仕歸吳杜門託蹙除知和州特轉行一官者再辭表至八九上得請乃已家居十二年雖舊所部候之人堅不與接紹定二年轉和州防禦使卒年六十九諡忠惠廟號忠烈虎有大將器功在江淮忠節罕比而文詞贍敏尤善大字名重一時

盧志 按宋史開禧二年十一月戊戌金人圍和州守將周虎拒之至十二月癸丑金人去和州虎全城之功可信然謂和議由此堅決則未然也

邱耒字少潛本胸山人祖礪徙家常熟

礪見流寓父璋通判寧國府

耒以蔭授於潛簿慶元錄事參軍淮東轉運幹官所至有聲知海鹽縣興起學宮築捍海堤二十里代民輸逋租郡有疑獄率委之平反民立石頌其德政薦者凡十八人監三省樞

密院門遷將作監丞出知台惠撫三州皆不赴終朝奉大夫
未生平尚義加厚族黨捐田以予姪王萬謂其天資素高才
足以運慮足以謀明足以察云

盧志

季逢昌字子明其先開封人南渡家許浦逢昌以麟邸懿屬補
登仕郎授迪功郎調通州支鹽倉兼沿江淮東制料官所至
以廉勤稱宋季海隅經北兵殘毀惟鹺官僅庇司存井邑荒
寂無行踪逢昌至弊端如絲悉與剗解暨秩滿爲贏十五萬
斤魏了翁時制江淮閩議復通城以軍券爲慮檄逢昌糴百
萬緡旬月事集了翁舉以練達科邱岳爲江淮制置副使辟
爲桐城令至則邑之吏民僑居池之李王河編茅葺葦俯瞰

洲渚縣庭猥爲墟學校鞠爲圃逢昌爲屣梳之五閱月而縣
解學宮皆成民以寧居淮閩愛其才復辟清流宰有疾辭歸
立義莊以賙族人稱爲長者子淵字宗源元大德初授登仕
郎博雅好古識鑒過人凡器物書畫一經品藻真贗莫逃與
趙文敏善遂與締姻官至蘄州路總管

鄧志

元

王珪字君璋其先汴人徙常熟珪天稟靈悟博覽載籍尤深于
凝神養氣之術嘗以材異辟同知辰州隱居養親辭不起中
歲築室虞山之間澄心觀道益有所得其居曰中陽丹房注
道德經撰泰定養生主論還原奧旨原道集四書道統山居

幽興集善鼓琴又工畫布置繁密意趣閑雅趙孟頫器重之號中陽老人晚辟穀年九十餘而卒其弟子高敬齋亦知名

鄧志

趙良滌字順卿宋宗室之裔祖崇驥仕吳遂家常熟良滌性純孝父必鑿為海州節推歿于官值宋季道梗良滌奉母備經

患難卒以樞歸元大德間東土大饑良滌以米二千二百石

助賑延祐間又饑復助以四百三十七石有司上其事都省

旌其門

鄧志

朱良吉支塘人延祐乙卯冬母錢病危良吉沐浴禱天剖胸割心肉煮粥與母啜之而病愈良吉心痛不能起邑人俞浩齋

聞而過其家觀其瘡可五寸氣騰出俞為納其心以桑白皮

線縫合之不逾月而愈

輟耕錄

黃公望字子久號一峯又號大癡道人陸氏子少喪父母貧無

依永嘉黃氏老無子居於邑之小山見公望姿秀異愛之乞

以為嗣公望依焉因用其姓

畫史會要云其父年九十始得之曰黃公望子久矣因而名字

焉性稟敏異溱思白發應神童科長乃博極羣籍其學無所

不通澗西憲司辟為掾史憲使徐某禮重之然非其好也一

日着道士服持文書白事憲怪而詰之公望即引去自是絕

意仕進放浪湖海所交皆當世名士開三教堂於吳門高僧

方士多執子弟禮遊錢塘愛杭之南山笱箕泉結庵其上將

為終老計已歸富春八十六而終善畫山水師董源晚年變其法自成一家其峯巒多礮石筆墨高雅人莫能及公望居小山日以酒發其高曠恒卧於石梁面山飲飲畢投髻於水而去卒悟山水神觀後村人發其髻殆盈舟焉山下有黃氏相傳公望之後

鄧志

繆貞字仲素好古博識隱居不仕中吳聞士皆禮重之善八分

小篆追蹤張有正書尤高古所著有書學明辨行於世

鄧志

侃字叔正博雅工詩善楷隸弟佚字叔民亦能詩善畫

龔立本常

熟志

黃錫孫字禹疇幼聰慧讀書即知求義理長勵行檢居窮守約

不易其介善造就後學為文尚理氣詩尤清粹有穀山集子

進德明德修德皆為本州教授

龔志

朱桓字仲威力學負志張氏據吳桓航海上書於朝授編修官

復朝服啟儲宮辭極懇切不報竟憂憤卒江陰王逢有寄朱

仲威詩張宣亦有寄朱編修詩其著述散佚所傳青暘集序

一篇殆淹博忼爽士也

龔志

時太初字大本博學能文詩尤俊逸與楊仲弘干壽道為文字

交嘗仕海昌其官賦白燕詩云珠簾十二中間捲玉剪一雙

高下飛楊鐵崖極稱之

龔志

曹貞字元度陸莊人元季喪其家資去游湖海上寄意詩酒終

身不娶有十洲三島詩傳於世鄧志

朱鏗字子新世有豐產鏗折節攻苦讀書無統綺習至正末家

燬於兵鏗不以介意挈妻子隱於城市後避兵長洲自號笠

澤漁者隔遠人事不知所終龔志

盛或字季文世為邑人生於富室篤志力學工詩文值元季兵

亂徙家崑山與楊維禎鄭東秦約文質陸仁輩游所著有歸

胡岡集龔志

陸景元字子善行義端方博學有文其詩高古有思致隱居城

市以薦除清河教諭又鄧士瑛字伯琚文行與景元相上下

遭亂不仕與錢甦輩以學相砥礪吳訥推為前輩龔志

明

瞿嗣興字華卿父達元初百夫長遷巡鹽大使轉怯憐口提領

嗣興生而純慤母患癰癩潰當長夏臭穢不可近嗣興燻湯

洗沐執扇驅蚊蚋靡晝夜至月餘乃休既又罹積氣疾百藥

不治乃刲股肉作羹以進母不食已五日忽盡啖之氣銷如

失一日母思芟食時芟始花求諸市不獲凡川有芟者解衣

入水覓之雙脛皆赤腫俄得三芟人以為精誠所感宅心仁

厚單窶者必思賑給而不欲其知璫工王氏家無儋石卧疾

不能興雞初鳴嗣興往以錢二十緡投窗隙而去民有告糴

者鶉衣百結嗣興受其直五千復佯問曰吾性多忘若欲糴

十千耶遂如數與之歲大儉來依者數十人擇旁舍舍之會
癘作病者相枕藉嗣興躬攜粥藥撫視卒賴以全嘗於道中
拾遺囊又拾契券及白金悉值其人還之嗣興雖不讀書其
篤行雖鄒魯士不過也

宋濂
撰傳

徐洪字彥弘家富甲邑中號徐半州洪尚禮好士如楊維禎倪
瓚陳基輩皆延致之又以博雅稱元季吳中豪右多踰侈明
初更化洪忽諭幹人潘珪曰家之興廢厥有常理吾家業盛
矣必有代謝今將舍此而去爾宜有吾業遂舉田宅立虛券
授珪獨孳妻子築室宣化門外先隴之側布衣蔬食謝遠交
游自號桃源小隱年九十而終

鄧志

錢甦字更生常熟人博學專攻性理洪武十年應詔上書至中
書長揖不拜左右以為言甦曰未拜天子不敢先拜丞相遂
於本省聽辦事數月不得召會有詔募撰祭元幼主文甦亦
擬撰以進上得之大喜即日召見欲官之以老疾辭賜歸卒
甦初名沂字伯與洪武初坐事當刑其子迪代之死故易今

名姑蘇志

瞿莊字敬孚孝子嗣興子洪武初以薦擢翰林典簿宋濂為侍
講稱其文學蔚茂勵行堅凝應制諸作率皆稱旨遷禮部員
外郎陞福建左參政嘗致一老吏於極刑丞相奏之帝手詔
嘉獎又同邑鄭思先字歐仲洪武六年以儒士被徵授國子

助教歷御史官至福建布政使所至奸壬斂跡鄭金字公濟

洪武二十四年由明經授大理評事進御史陞廣東按察使

改福建左遷濟南知府為人英敏抗志不屈能詩善書翰龔志

虞宗齊字思訓常熟人父兄並有罪吏將逮治宗齊謂兄曰事

涉徭役國法嚴往必死父老矣兄冢嗣且未有後我幸產兒

可代死乃挺身詣吏白父兄無所預吏疑而訊之悉自引伏

洪武四年竟斬於市年二十二明史 按史作宗 濟今從縣志改齊

錢廸甦之子洪武初父以督稅愆期當刑廸慨然詣執政求以

身代所司上其事許之死時年甫十八甦得優老而終從子

完感其孝立祠祀之龔志

徐植字元芳父彥達掌鄉賦狃於元季弊政賦入後期法當刑

植年二十八赴所司自陳引為已罪所司不能奪遂從其請

臨刑賦詩曰父母恩同日月高願將一死報劬勞三杯白酒

濃如醜七尺青絲利似刀風送斷魂歸故里月移枯骨葬荒

郊遙知親族偏憐我淚灑西風濕布袍邑人王廷珪為作孝

子傳鄧志

陳貞字子固洪武初母沈患心痛垂革貞割股雜羹中以進母

食而甦越三日痛復作貞欲剔心再進母覺之謂貞曰汝誠

篤孝若爾我心益痛止之是夜沈夢土神周孝子授以紫蘇

飲服之愈人以為孝感云鄧志

林大同字逢吉其先長樂人曾祖以下皆官常熟因家焉大同幼孤苦力學六經子史手自抄讀不間寒暑洪武中為開封訓導以病歸永樂初再召以疾辭所著易經奧義并文稿若干卷姑蘇志孫宗字思孝弟完字思勉俱隱居事學並善楷隸宗子儒字應良傅字應祖通家禮邑之治禮服者多質之兄弟亦善篆楷同時有袁惠字弘濟亦和謹習禮容熟于鄉射儀以壽得章服鄧志

施顯字孟微常熟人洪武中鄉會試皆第一選庶吉士改前軍都督府斷事官又署北平按察司事坐累謫遠州踰年乞留中自劾拜江西道監察御史卒於官顯讀書勤苦盛暑坐帳

中帳頂皆黑子緒集其文名兩魁遺稿姑蘇志

金亮字伯熙洪武戊寅貢入監時有詔國子監拔學行俱優者十人授以要職而亮與焉擢工部主事奉命督山東漕運五十萬餉邊還朝進員外郎有寶鈔之賜再被命採木四川取宮材四萬九千餘株再賜紗衣寶鈔仍督造承天門鹵簿金輅奏免誣援為匠者萬計市筏龍汪灣却絕賂遺人皆德之進郎中永樂甲午卒於金陵張洪每歎曰伯熙公忠廉介通達治體止於此命也曾孫鶚字世英以太學生選授肇慶府推官以清謹著稱德慶州猺獠作亂鶚以恩威宣撫之不煩兵而下歷署陽江新興高明恩平篆四邑皆殘破之區賴以

更新武廟登極鶚攝守表賀卒於南康

管一德常熟志參龔志

鈕衍字公裕洪武丙子由監生擢常德知府下車即招集逃亡

論誅左道政尚清簡任滿赴天官考績父老伏闕請留上嘉

其績擢雲南參政尋調廣東未幾卒年三十九

龔志

黃鉞字叔揚常熟人少好學家無書從市肆借觀輒記憶不忘

時天下初定重法繩下士不樂仕其父屢懲之不能止家有

田在葛澤陂因令督耕其中有楊澹者家多藏書見鉞勤讀

邀至舍與其子福同居縣聞之并辟福澹恚以鉞為累其子

鉞教福結束如農夫有所問第操吳音如其言縣果獨遣鉞

授宜章典史建文元年舉湖廣鄉試明年第進士授刑科給

事中陞戶科左又改禮科三年丁父憂方孝孺弔之屏人問

曰燕兵日南蘇常鎮江京師左輔也君吳人朝廷近臣今雖

去宜有以教我鉞曰三府惟鎮江最要害守非其人是撤垣

而納盜也指揮童俊狡不可任奏事上前視遠而言浮心不

可測也蘇州知府姚善忠義激烈有國士風然仁有餘而禦

下寬恐不足定亂耳國家大勢當守上游兵至江南禦之無

及矣孝孺乃因鉞附書於善善得書與鉞相對哭誓死國鉞

至家依父殯以居燕兵至江上善受詔統兵勤王以書招鉞

鉞知事不濟辭以營葬畢乃赴既而童俊果以鎮江降燕善

為麾下縛去鉞初聞變不食後稍食及聞善死起登琴川橋

西向再拜祀善哭曰吾與君同受國恩今君與希直同死吾
 忍獨生乎祀畢給家人歸祭具整衣冠入水死時收善黨急
 且訛言將錄鉞家親族悉驚伏楊福具棺衾日夜泣橋側求
 鉞屍更數日屍忽自出立水中體猶未潰成禮葬之明末追
 諡文獻明史叅楊儀傳獻徵錄 明史童俊以鎮江降燕下
 云鉞聞國變杜門不出明年以戶科左給事召半途
 自投於水以溺死聞故其家得不坐按此與諸書皆不同而
 琴川橋事邑人相傳至今故從儀傳及獻徵錄又楊濬福父
 子事及方孝孺來弔屏人語錢謙益龔立本皆言鉞無此事
 乃楊儀假託然吾學編獻徵錄明史皆据此立傳蓋傳聞既
 久未可因一二人
 之言而遽削也

張洪字宗海本姓侯氏父常客游燕母郁免乳五日而疾病張
 爛者養以為子幼喜讀書年十一補諸生十六去學賈既壯

坐鄰人累戍雲南帥臣延教其子會木邦刁干孟逐其主思
 倫法詔三司相度以聞布按二司皆以為宜姑置之以觀其
 變都司以問洪洪曰麓川昔擁三十六甸之衆入我郊保走
 都督馮誠有輕中國心軻於定邊之役羈縻至今其下叛亂
 天贊我也然既襲我冠帶有急不救不仁有亂不匡不義盍
 附順討逆納故酋使復其所及其未定裂宣慰司為二彼無
 國而有國德我必甚瓜分則勢弱不敢復與中國為難矣西
 平侯沐春善其策奏行之事遂平建文初以通經薦為靖江
 王府教授病免永樂初徵為行人奉使日本二年修茶馬舊
 政於番界四年使遼東其年秋緬甸宣慰那羅塔殺孟養宣

蘇州府志 卷六十一 人物十五
慰刁木旦而并其地詔洪往諭那羅塔返侵地立孟養後那
羅塔初不服洪宣朝廷威德凡六往始聽命既又謀鳩洪不
果與其使陶孟洛霞復命以薦召入文淵閣修永樂大典陞
司副洪熙改元進翰林修撰宣德初與修太宗仁宗兩朝實
錄書成乞致仕卒年八十四洪謫戍十五年登朝三十年使
車所至東日本西洮岷南夷緬北遼海往返四萬餘里以其
暇作為文章敷腴典則不事藻飾而理自勝在翰林時文武
詔誥多出其手既歸學益力討論經傳會萃折衷一時學者
莫先焉五經皆有解詁他所著南夷書日本補遺琴川新志
之屬多逸惟歸田藁使緬錄使規尚存

馮復京常熟先賢
事畧參新舊志

姚伯善字德全舉鄉薦永樂中擢禮科給事中旋晉兵科都給
事中同尚書夏原吉治水蘇松復請粟三十萬石賑饑後奉
命採木廣西陟險冒瘴卒於全州

龔志

衛浩字季洪武中才行貢入國學與修太祖實錄永樂初
擢御史奉勅閱幽薊諸郡文案搜抉隱弊時仁宗在東宮守
北平浩入見應對稱旨賜經書食物丁外艱歸起巡遼陽克
振風裁在朝屢進讜論上識之曰長面御史直臣也冤獄多
所平反邊將繫送從征後期者至京師法當大辟浩請使立
功自贖出為江西副使轉福建居職鯁挺務行其志有刑部
侍郎某巡視閩中得專刺舉藩郡皆入賄以異免浩持其不

法將奏之其人懼誣以罪勒停其官

鄧志

張信字孟孚少負奇氣弱冠有明經譽舉永樂元年鄉試授建寧府學教授學矩修飭士遵其教是時用人不次陞國子司業信謂國學師長必以才望豈容躡處辭不拜乃授國子助教久之陞翰林檢討著作爲同列所推名能舉職宅心誠懇人信服之以疾卒於官

鄧志

張衡字以平詞翰俱清永樂初徵入禁廷書誥以親老乞歸孫懋字時勉正統辛酉舉于鄉授鄱縣訓導終武邑教諭風範端謹誦讀自娛三子堯民湯民安民皆爲月旦所推堯民嘗分纂邑乘懋有從弟曰學甘貧好修治詩經有名王端毅恕


遣子承裕受業焉宰遂安九年治尚簡易引疾歸子京安舉進士又有張緒者字廷瑞居鄉校有才名以薦爲會昌侯府教授詞筆通贍楷法端謹其墨竹亞於夏景

龔志

吳訥字敏德常熟人父遵任沅陵簿坐事繫京師訥上書乞身代事未白而父歿訥感奮力學永樂中以醫薦至京仁宗監國聞其名命教功臣子弟成祖召對稱旨俾日侍禁廷備顧問洪熙元年侍講學士沈度薦訥經明行修授監察御史敬慎廉直不務矯飾宣德初出按浙江以振風紀植綱常爲務時軍犯逃者往往令家人妄懇逮繫至千人訥請嚴禁卽寃不得越告從之繼按貴州恩威并行蠻人畏服將代還部民

詣闕留不許五年七月進南京右僉都御史尋進左副都御
 史正統初光祿丞董正等盜官物訥發之謫戍四十四人右
 通政李畛者奉使蘇松行事多不謹訥微誠之畛不悅誣訥
 稽延詔書等事訥疏辨互為臺省所劾俱逮下獄既而釋之
 英宗初御經筵錄所輯小學集解上之四年三月以老致仕
 訥博覽議論有根柢於性理之奧多有發明所著書皆可垂
 於後歸家布衣蔬食環堵蕭然周忱撫江南欲新其居不可
 家居十六年而卒年八十六謚文恪鄉人祠之言偃祠明史孫
 淳字厚伯正統戊辰進士拜監察御史性度溫厚動止有儀
 奉命清理南畿軍政巡視兩淮鹽法不墜家聲以勞卒於官

曾孫堂字子升弘治己未進士授蠡縣知縣擢御史清戎江
 西時宸濠方蓄異謀堂昌言正色宸濠頗氣懾劉七之亂命
 堂監陸完軍賊平遷大理少卿以會議所屬聲調鶴慶知府
 嘉靖六年復原職後為雲南直指論閑住龔志按馮復
 苗裔其先坐事亡匿以子游追封吳公故改姓吳京謂訥本子游
 氏訥者藏言於內也龔立本据訥自序辨其不然
 殷瓚字廷璧永樂甲申進士任建德知縣縣在萬山中其民儉
 朴瓚問民疾苦平賦役敦教化秩滿遷岳州府同知士民卧
 轍垂淚遠送尋遷臨江府知府政尚寬簡為諸郡冠比歸行
 李蕭然至食貧以卒龔志
 魚侃字希直常熟人永樂甲辰進士任刑部主事改工部從都



御史王竑往清河督運河多淺漲常梗漕舟侃奏置淺舖夫
時加疏濬運遂通撩淺置卒自侃始陞刑部郎中出知開封
府斷決明允苞苴迹絕人謂其治似包孝肅母亡家人往訃
值侃方視事未敢遽白侃覺之長號以出即日行不持官府
一物歸無以為資或日罷炊所居敝壞病卧雨溜濕床簣寒
衾單薄家人愠見曰開封守亦有今日耶侃夷然自得也生
辰客為壽壻王韶方居喪以素服往客止之侃遙見招之執
其手曰此真吾壻也同時邑人錢昕字景寅以進士擢御史
按浙江有勳臣家僕怙勢橫郡邑以輿蓋出入奪人婦女昕
逮至立捶殺之知荊州府進參政再遷左布政使皆以廉慎

稱然昕故富家而侃貧人尤難之鹽山王翱在吏部常稱曰
富不愛錢錢昕貧不愛錢魚侃

姑蘇志叅縣志
昕即姓之曾孫也 按

唐敏字志學年十三能背誦五經既長博極羣書舉永樂十二
年鄉試歷浮梁寧津棲霞汶上四縣教諭所著有詩經鈎旨
博古要覽寒碧歸田二稿子元中山東鄉試曾孫天恩自有

傳

鄧龔二
志合纂

季篴字仲怡常熟人永樂末以經明行修薦授崑山訓導遷山
東巢縣教諭篴有文學勤於纂述所著有友梅集崑山常熟

崇明三志

姑蘇
志

陳壽字仲器文行純雅父母相繼亡廬墓六年患目失明一夕

夢白衣人爲之洗既覺雙瞳豁然適有僧往過見白龍盤繞其墓上云吳文恪贈以詩曰陳子廬親墓六年雙目瞽神龍爲洗開孝行昭千古

龔志

章珪字孟瑞常熟人宣德初以薦授廣東按察使知事擢御史出巡畿甸值歲旱奏蠲逋稅三十萬石獄有濫繫皆辨釋之正統八年疏論大臣罷歸時與其直子儀表格律儀字來鳳以鄉薦任荊州府學教授學行爲諸生所敬愛陞南京國子助教轉北京致仕年八十卒儀性敦厚澹於世味諸弟鼎貴儀視之泊如也表字翔鳳景泰庚午鄉試第一辛未舉進士選庶吉士出爲行人陞刑部員外郎進郎中遷廣西左參議

恃才傲兀以考察去表文筆奇古類樊宗師有集燬於火格字韶鳳舉進士授南京工部主事轉刑部郎中陞廣東按察副使巡視海道琉球國使臣蔡璇等以番貨轉販他境遭風漂至香山徼吏得之欲盡戮以爲功格爲奏辯還其資而遣之遷雲南按察使緬甸諸夷叛服不常格善於撫綏莫不畏服遷福建左布政使召還爲南京光祿寺卿遷大理寺卿致仕詔馳驛歸年八十卒賜祭葬格敷歷中外幾五十年所在以清謹聞爲人尤號長者律字鳴鳳舉進士授刑部主事陞員外郎民有姑訟婦不孝有司鍛成其罪律疑而鞫之乃婦寡居夫兄數挑之不從後夫兄喪妻姑強婦偶之又不從以

此失姑意律脫婦罪并治其夫兄有卒縱其妻與千戶通求無厭千戶不能應則殺之事窮并殺妻提二首以殺奸告律正其罪擢保定知府遷雲南右參政轉廣西遷右布政使荔浦撞賊竊發律帥泗城兵由象武路扼陳村口以當賊衝與戰大破之改貴州擢右副都御史巡撫雲南召為南京左副都御史免歸

鄧志

程式字以則舉進士授南京兵部主事遷刑部員外郎以明允稱土木之變扈從死難贈奉訓大夫蔭子嵩仕至延平府同知所著有兵政十策葩經衍義

管志

呂困字希顏幼好學文有奇氣登正統己未進士授行人轉御

史巡歷湖湘以舉職聞陞湖廣按察副使武岡徭寇竊發困會師討平之進雲南按察使陞左布政以資當遷時執政方納賂使人諭意困曰與其枉節而遷不若納祿以歸竟罷其

鄧志

朱驥字漢房生而聰慧讀書過目成誦登正統壬戌進士授行人遷御史奉命慮囚淮南出濫入者百餘家又按永平有滯獄株連百人驥召而訊之立決吏庸冗者多被斥大學士李賢方得政尚書金璉附之驥劾璉并侵賢賢不悅出驥為廣西僉事進左參議安遠侯柳慶征徭久無功驥陳十策慶用其言遂大捷以公事入京便道過家俄感疾卒年四十六驥

有智數爲人所憚云

鄧管二志合纂

邱方字仲野東海侯岳之後性至孝博學宏文正統初應賢良方正科授江西泰和知縣廉慎坦夷歷二考辭歸其文醇則無纖靡習有松濤集若干卷子雲鶚字世騰以鄉舉授湖口知縣有治才文筆勁健有家矩人稱西園先生

鄧龔二志合纂

湯洪字宗範嗜學至廢寢食泛涉諸經治書尤精提學彭勗論南士經學以洪爲首舉景泰庚午鄉試授江山縣學訓導陞祁州學正仕不得意遂棄去家窶甚劬書得目眚吳士劉欽謨以學自雄人莫與抗一日聽洪講斂衽歎服逡巡避去博覽強記人以書厨目之

鄧志

陸泉字孟昭景泰辛未進士任刑部郎中嘗錄囚畿內所平反甚衆被命按事河南山西還奏稱旨陞福建參政奉敕巡視海道先是有通夷商舶掠殺人泉擊擒之漳泉二郡水薄城爲築堤防捍聞人服其威惠竟以讒罷泉性喜延攬篤於故舊所至必飾軒亭蒔花竹時儲名醞珍羞客過必畱緣此得

豪俠聲

龔志

程宗字原伊景泰中由進士授刑部主事遷員外郎出知吉安府吉安最號劇郡宗能治姦黨屏跡政聲赫然父喪歸改知武昌府復有治績擢四川參政再擢陝西右布政尋轉左入爲副都御史時兵部以陝西地重務得人以經理邊事乃推

宗往鎮遭母喪再起巡視雲南名為刑部右侍郎尋陞工部

尚書致仕姑蘇志按舊縣志詳載宗為副都御史遭母喪服將闋奉命宣諭木邦孟密事尋留撫雲南六年

且頌其撫綏之功今考明史孟密本木邦所轄屬夷蠻婦曩

罕弄叛木邦逐宣慰殺掠鄰境成化十八年朝廷命程宗與

譯者序班蘇銓往諭銓受曩罕弄子思柄金給宗奏設孟密

安撫司以思柄為使直隸布政司時木邦為孟密所侵兵力

積弱不能報屢奏訴竟不得直至弘治三年木邦宣慰罕究

法發受金事時宗已致仕巡按請追罪之帝以為事在赦前

不問自宗勘處失宜諸酋長進退紛紜中國用兵且數十

年是宗於此事有罪無功舊志不足信姑蘇志畧之是也

楊集字浩然景泰甲戌進士觀政兵部時禮部郎中章綸御史

鍾同以疏請復儲事下獄集上書于謙曰奸人黃玠獻議易

儲不過為逃死計耳公等遽成之公國家柱石獨不思所以

善後乎今同等又下獄矣脫諸人死杖下而公等坐享崇高

如清議何謙以書示王文文曰書生不知忌諱要為有膽當

進一官處之遂除安州知州以上參探明史鍾同傳至州軫惜災黎裁

酌馬政貴戚奏求莊田內臣出畋畿郡皆力爭之會同事坐

法事連集時逸杲典詔獄遂落職歸子舫成化丁酉舉人授

莒州知州舫臨政清簡聽決明辨人服其治子儀字夢羽嘉

靖五年進士除工部主事歷兵禮二部郎中以廉能稱北部

入貢擾都下邀厚賞儀名讓其酋為之約束遂不敢譁時夏

言方枋用愛其才使代草章奏國家大事多與密議欲薦達

之會言寵衰儀出為山東副使備兵霸州流賊方熾遂移病

歸家居惟以讀書著述為事構萬卷樓聚書其中率多宋元

舊板及名人墨蹟天性簡亢監司縣吏非折節下之罕見其面與鄉紳會飲鄙其無文不交一言御史錢籍家奴為盜儀尤惡之籍恨甚遂誣儀子殺人執至家榜掠累百儀忿悒以卒外孫莫是龍白其冤於巡按御史捕籍子死獄中諸劇盜皆論斬云龔志

蔣紱字洪章景泰甲戌進士擢試御史石亨有母喪傾朝縞素往紱獨吉服過其門亨怒會有譖之都御史李實者黜為吉水知縣以治聞改光山王翺為吏部雅知紱將以大理召會去位不果不得志解職歸紱孝于親博覽羣籍晚精醫術治病多奇驗常熟先賢事畧弟績字洪勳成化癸卯舉於鄉授開化知

縣發姦摘伏人不敢欺歷九載乞休士大夫立石頌德錢陸燾常

熟志

朱鉉字良玉領順天鄉薦僑居都下會御史員缺詔選用貢士鉉得授江西道御史出按宣府諸邊請定占役法衛官不得占士役於家國法邊牆二百里外屯牧者不問一日有邊將獲數人徼功鉉疏請釋之又論都給事中童軒撫蜀欺罔報聞坐不糾儀謫桐廬知縣久之復前職出按南畿歲饑發倉賑民以疾卒龔志

湯琛字魯寶敏悟絕人摘文頃刻數千言登天順丁丑進士擢刑部主事進員外郎出為廣西僉事皆勵職業性剛寡諧好

面斥人不少避人皆畏之故舊寒峻者交特厚視顯貴蔑如也所賦有倚韻牡丹梅花百詠傳於時

龔志

桑瑾字廷璋景泰丙子領鄉薦與兄瓊弟瑜在國學有名瑾選處州府通判麗水松陽二邑間故有通濟堰蓄水可灌田數千頃一夕爲雷霆擊破瑾修復之又捕巨寇吳大八夏文義有功秩滿當遷引疾致仕瑾孝友之行可方古人以親不逮養終身不受燕賀瓊病於京邸爲嘗惡以驗疾仲兄琳墓割隸太倉立祠祀於家姊少寡迎歸以養著述甚富門人私諡淵靜先生瑜字廷瓚弱冠舉於鄉不第選温州府通判其治尚寬屬邑泰順有銀礦歲久礦微官取盈額民多破產瑜白

於上官遂得奏減瀕海有地曰蒲莊設二千戶領卒備倭寇卒侵平陽民田累訟不決瑜被檄往勘冒瘴踰鐵沙嶺籍其畝定其稅民大悅温有鹽竈戶多逃亡課坐是虧部臣議以三丁充一丁竈戶攜老幼泣訴於瑜瑜稽舊額以復戶部卒從其言温有謝靈運夢草池瑜作堂其上瑾往自處州每相與觴咏初瑾瑜拜命同日出都門居官八年相約致仕遂同舟歸里年俱未滿五十士論高之

鄧龔兩志合纂龔志瑾子翹字民起知萬安縣有

修學築城績後通判泉州介字子石知滋陽縣居三月恥於折腰遂謝歸有和陶集介之子大協字華甫知清流縣清流人尸祝之遷杭州通判以訊獄忤鹽使解官歸自瑾至悅一門五通判悅自有傳

陳易字一元邑之文村人父喆字成夫隱居好學治春秋折衷

諸說名曰集解易舉天順壬午鄉試除建昌府推官初詰嘗著居官一覽易遵行之民有胡萬八者以怨殺其叔事秘久不決易廉得之胡屬顯要為解竟抵於法廣昌獲盜誣引五十餘人郡將鍛成易察其寃縱之廣昌歲仍旱民聚為盜易遣人入賊中以色線縫其衣盜潛入城驗衣輒得之乃言於上官發倉賑民盜皆散去邑有虎患易移文於神遂焚其穴易母老而賢手製紡織具遺官中家人治布以資費郡守聞而賢之遷黃州府同知課復最吏部尚書王恕第其治為諸郡首將擢用之以母老力請致仕易性孝母病思肉不能進易感之終身不御肉

鄧志

蘇州府志卷第六十二

人物十六

常熟縣

明

李傑字世賢年十七中應天鄉試成化二年舉進士選庶吉士授編修歷遷侍讀學士充東宮講讀官孝宗即位以舊恩遷左庶子修憲宗實錄進南京國子監祭酒憂歸服闋起太常少卿復為東宮講讀官皇太子年少好嬉戲傑正色欵辭隨事匡正遷南京禮部右侍郎召入北部徙左侍郎十七年春不雨至於六月受詔禱天壽山即日雨上大悅孝宗崩充山陵使預修實錄為副總裁遷南京吏部尚書明年徵為禮部

尚書傑性行純粹不能詭隨苟同逆瑾亂政嘗囑以事不聽饋之瓜以嘗其意又不報謝瑾嫉之然無以中也會鎮國將軍表謙求封郡王成化中數奏請不能得至是入賂於瑾瑾銳意欲王之集府部科道官於左順門厲聲詰曰親王子封郡王祖訓也前部臣不省虧損上恩離間骨肉罪當云何傑對曰祖訓親王子封郡王今將軍乃世子子不當王爵先帝業有成命矣公將割損正法以奸先帝之命焉用傑也瑾怒馳去將論其離間罪上雅厚傑卒不能傷傑力請致仕歸瑾誅吏部首薦傑不起卒年七十贈太子太保諡文安

常熟先賢事略

徐恪字公肅常熟人

邑志云父訥字敏叔家富好施予累世同居嘗輯古今同居者為一集梓行以勸世

又取袁氏世範浦江鄭氏遺範為家規以訓子孫鄉黨稱其篤行生八子恪其季也成化二年進士授

工科給事中中官欲出領抽分廠恪等疏爭中官怒請即遣恪等將摭其罪無所得乃已出為湖廣左參議遷河南右參政陝西饑當轉粟數萬石恪以道遠請輸直上下稱便弘治初歷遷左右布政使徽王府承奉司違制置吏恪革之王奏恪侵侮帝賜書誡王河徙逼開封有議遷藩府三司於許州者恪言非便遂寢四年拜右副都御史巡撫其地奏言秦項梁唐龐勛元方谷珍輩往往起東南今東南民力已竭加水旱洊臻去冬彗掃天津直吳越地乞召還織造內臣勅撫按諸臣加意拊循以弭異變帝不從故事王府有大喪遣中官

致祭所過擾民成化末始就遣王府承奉帝卽位又復之恪請如先帝制并條上汰冗官清賦稅禁科擾定贖例革抽分數事多議行戶部督逋急恪以災變請緩其事御史李興請於鄖陽別設三司割南陽荊州襄陽漢中保寧夔州隸之恪陳五不可乃止恪素剛正所至抑豪右祛姦弊及爲巡撫以所部多王府持法尤嚴宗人多不悅平樂義寧二王遂訐恪減祿米改校尉諸事勘無驗坐恪入王府誤行端禮門欲以平二王忿帝知恪無他而以二王幼降勅切責命湖廣巡撫韓文與恪易任吏民罷市泣送數千里不絕屬吏以羨金贐揮之去至則值岐王之國中使攜鹽數百艘抑賣於民爲恪

所持阻不行其黨密構於帝居一歲中旨改南京工部右侍郎恪上疏曰大臣進用宜出廷推未聞有傳奉得者臣生平不敢由他途進請賜罷黜帝慰留乃拜命勢要家濫索工匠者悉執不予十一年考績入都得疾遂致仕卒

明史

陸潤字昌澤成化丙戌進士知閩縣俗好訟潤執一二寘於法風少止番使入貢者往時多濫給廩餼潤爲裁省內艱歸服除補知清平縣遷太僕寺丞擢溫州知府溫有銀冶盜時竊發豪猾代輸公賦潤皆嚴禁之修築石堰百餘里以捍潮汐倭劫瑞安巡撫彭韶欲以失機論潤以海鄉無城壁力屈於守禦爲爭韶從之滿九載中蜚語罷歸家居足跡不履公府

卒年八十三

鄧管二志合纂

沈海字觀瀾成化丙戌進士授刑部主事時有疑獄久不決海一訊得其情老於法者自以為不及也陞員外郎郎中遷泉州知府始至摘發偽造倉印二十三顆人皆股慄歲旱禱於天有願捐十年壽化為三日霖之語雨遂大澍內艱歸服除補重慶知府考最當遷以年至致仕家居好讀書卒年八十

五所著有葵軒遺藁

李傑撰墓表參管志

瞿俊字世用邑之五渠人成化五年進士知崇仁縣以最遷監察御史出按江西刺舉不避權要遷廣東按察副使律已廉不可干以私嘗出見市箒者呼而入分箒給諸僚有僚素乏清譽倍給之問故俊曰君庭多穢耳僚捉研擲之俊被傷以病致仕家徒四壁不著嶺外一物比舍皆漁戶時時就之席地飲箕踞相爾汝每入郭率晨候載菱小艇歸仍附之善為詩酒次立可數百言

鄧志

王鼎字元勳成化己丑進士授南京刑部主事遷郎中歷湖廣左參議廣東左參政屢著能聲以公事忤都御史閔珪解職歸為人有風裁篤於行誼南京御史蕭山何舜賓者與鼎善以事謫戍赦歸里與邑令鄒魯有怨魯強械舜賓赴戍所使人於途中殺之舜賓子競挈家歸鼎鼎泣而授館衣食之誓為復仇會魯陞僉事去鼎出二百金資競使求死士刺之不

死廢其目法吏當競死鼎復資競母入都擊登聞鼓上訴事
下大理評事曹恕謂魯官已遷不得以親臨比且援唐梁悅
事為證競得減死天下稱競孝而高鼎之義常熟先賢事
略參邑志

錢洪字理平與兄寬字理容世家奚浦能詩好客一時名輩如
劉溥湯允勣沈周皆與之游兄弟皆度量闊達洪愛種竹堂

曰竹深處寬號柳溪洪即謙益七世祖也

錢陸
燦志

陳蒙字允德常熟人正統中四明蘇秉衡號能詩蒙喜步驟之
遍擬楊伯謙唐音一走筆數十篇泉決雲涌卒以詩人稱用
薦上公車與盡邁返名其紀行集曰泛雪又自號東家生沈

周誌其墓世父符字原錫亦有詩名

列朝
詩集

蕭奎字漢文邑之河陽人父韶字鳳儀該洽有俊才詩多警語
年三十餘卒奎幼好學舉成化八年進士授工部主事奉命
督造運艦於淮安勤慎自將人不敢干以私有常例千餘兩
奎斥還之進員外郎兼領神木廠太監顧雄者嘗事憲宗於
東宮命監軍北邊擅殺一大將有罪宥死斥居廠中他日占
役廠卒奎不許廷議復用雄奎上疏極論雄泣訴於上改奎
理刑未赴官卒於家鄧志族孫應官字觀復萬歷甲戌進士由
刑部郎中出知東昌府備兵潼關固原臨洮火落赤寇邊應
官張疑設伏寇引去倭躡朝鮮以遼海道監東征軍南原之
役師徒大衄制府反以捷聞應官力爭之遂徵下獄論戍奉

赦歸錢志

褚祚字昌允成化八年進士授臨海知縣縣有嶺途雨三日淖陷則薪米斷絕祚繕治之人名為褚公嶺茶山素為僧業鄉豪侵占訟數年不決祚閱其牒立召僧以山論還之召為御史命理畿內馬政多所釐革俄以疾卒於京師同年生吳寬貽衾以斂在臨海時其弟往視瀕歸無以為遺以父所授田予之父國蕃有高行祚歿後交游仕於吳者所贈遺皆峻却嘗赴郡守召人有冒重法在郡者以千金求解國蕃謝絕之其操守如此龔志

桑悅字民懌常熟人讀書過目輒焚棄曰已在吾腹中矣敢為

大言以孟子自况或問翰林文章曰虛無人舉天下惟悅其次祝允明又次羅玘悅為諸生上謁監司曰江南才子監司大駭延之校書預刊落以試悅文義不屬者索筆補之年十九舉成化元年鄉試試春官荅策語不雅馴被斥三試得副榜年二十餘耳年籍誤二為六遂除泰和訓導學士邱濬重其文屬學使者善遇之使者至問悅不迎豈有恙乎長吏皆銜之曰無恙自負才名不肯謁耳使者遣吏召不至益兩吏促之悅怒曰始吾謂天下未有無耳者今乃有之與若期三日後來瀆則不來矣使者恚欲收悅緣濬故不果三日來見長揖使者怒悅脫帽竟去使者下階謝乃已遷長沙府通判

調柳州外艱歸遂不出居家益狂誕鄉人莫不重其文而駭其行初悅在京師見高麗使臣市本朝兩都賦無有以為恥遂賦之居長沙著庸言自以為窮究天人之際所著書頗行

於世

明史

狄雲漢字天章沙溪人後徙華蕩為人清勁有風概舉順天鄉試授沅江知縣沅江為湖外小邑俗樸易治雲漢尚寬靜民愛之郊外有佳山無事出游民挈果茗候於郊雲漢停輿受之童豎為掖輿而行語之曰汝等善自愛吾數出游汝不能供也皆喜拜而去沅有湖盜終雲漢任盜不入邑郭調判臨清州遂解職歸寓於虞山之下食常不繼吟嘯不輟有薄田

二十五畝於湖壩不任耕而廢之戲自號為餘夫其詩清古

絕俗年八十餘卒

鄧志

周木字近仁成化乙未進士授南京行人司副王恕秉銓奏為稽勲司郎中預修憲宗實錄懿祖祧祭木奏言祧廟之祭遷祖宗之主居不享之室比之常祭樂少而哀多乞是日免朝精一其心以供祀事奉命冊封岷王會災異詔求直言木上疏論今天下極弊莫如賦役請勅戶禮兵工四部條出大小賦役逐一因革廢置禮部災下尚書耿裕等於獄木復疏救遷浙江右參政理杭州前後二衛戎籍稽隱漏辨枉抑人稱其明杭俗葬用水火木惡之下令以戒立義冢於三山作道

南書院修岳鄂王墓復其墓田論建漸廣爲同官所忌遂致仕去自宋季迨元吳士惟治文詞鮮以理學爲務明興吳訥闡發正義其學自小學入字析章解寧爲切近而無隱奧所得粹然木後出益振起之嘗讀近思錄而悟爲學之要大學自經朱子定著諸儒猶有紛更木以己見辯正不爲苟同晚尤好易因邵子所畫諸圖推而衍之縱橫變置皆有條理其於洪範所陳配合皆有倫類木事親孝與弟彬友愛尤篤於族人計口而給歲費甚廣而其家廩無贏積也冠婚喪祭禮廢已久木考古以行於家其書有易心逸說文集奏疏若干卷卒年七十二學者稱勉思先生彬字近德成化丁酉舉於

鄉累試不第卒於京師兄木以例請授通州州判初木久仕於外彬侍父有禮營別墅以居養木官南都歲往省相與講學爲人有持操鄉譽甚著有王恩者遇盜途中盜掠其貲問姓名王詭曰吾周彬也盜驚歸所掠而去

鄧志

錢承德字世恒昕從姪父昌字允言博學工詩承德舉進士知阜平縣奉檄決他縣滯獄皆得其情擢御史巡北城兼九門出稽兩廣錢穀又理山東鹽法巡視河道坐朝參失期左遷犍爲知縣縣境連馬湖有鹽井北山竈丁頑悍負險不應徭役承德選有幹略者爲耆長往諭之俱服從歷知蘄州冀州擢山東按察司僉事遷副使飭理密雲邊備兼永平府衛屯

田訟牒邊關堡障修其廢壞以勘獄事降新興知州遷福建
 鹽運司同知再以勘獄事罷職承德所至持風裁不為訛駁
 取容以故數起數躡家構西園有奇石五名五老峯又有放
 盆池沁雪亭諸勝日與名賢輩觴咏其中而與從兄仁夫倡
 和尤多有五峯集若干卷

管志

陳九疇字公範弱冠卽厭科舉有志性理之學嘗讀周子通書
 疑其倫次無統因其遺文九篇之語遂以其意定為九篇篇
 有解以程氏之學莫大於求仁述求仁至言憫東南數被水
 患而白茆廢不治為述水利事宜一書九疇於象緯占候方
 技之學無所不窺嘗與錢承德入郡泊岸下命亟移舟錢問

故曰此有火厄頃而火作延焚他舟所著有悅齋集弟九韶
 字公美記覽精博以謹介稱

鄧志

王宗錫字元善少有俊才提學御史戴珊得其裴度論賞之舉
 進士知餘姚縣政有芒刃聽斷精審有陂介蕭山餘姚之間
 遇旱民阻水爭訟不解宗錫審其地勢為築堰防使民各保
 其水利訟乃息擢御史奉命往福建理戎籍立連坐法凡脫
 隱者許自實得漏卒無算再按江西列郡俗嚚善訟民有代
 訟者率舁棺而訴於庭宗錫痛治之刁風為衰滅彭蠡湖有
 渡舟其人負險索無藝不遂則加虐焉宗錫命造官艦召故
 以渡為業者使領艦一日盡得之皆寘於法浮梁有豪人姻

於臺長宗錫捕治其不法事如律遷山東按察副使卒於官

鄧志

馮玘字良王先世戍鳳陽至玘乃還常熟舉進士授泌陽知縣縣多豪猾玘至取數人寘於法自是相戒不敢犯陝右兩河饑民入境玘發粟賑之徵爲御史京師大雨壞民廬舍玘劾奏大學士劉吉不職宜罷斥以荅天譴不報出按貴州都勻獠叛再疏請剿詔會師討之遂郡縣其地主事李文祥忤權貴謫興隆衛玘疏辨得召還復按浙江鎮守中官恣橫玘繩治其下中官窘亦誣搆玘上察其詐配其人於邊還朝會召胡僧領占竹玘言妖僧不足辱王命出爲福建副使致仕卒

鄧管二志合纂

聞釗字遠明成化辛丑進士除南京大理評事進左寺副寺正性巖峭守法堅正論駁無所阿縱大璫蔣宗居南都專橫多不法給事中方向論奏之宗因誣向下大理獄釗直向罪宗遂爲所搆左遷華容知縣在縣能振其職以清絕稱未幾卒

於官志

蔡坤字一寧七歲能爲詩舉進士擢刑科給事中輔臣萬安學士尹直皆憑寵專恣坤疏其罪不報最後李孜省以左道進內侍梁方陳禧等相倚爲不法坤並論之直聲震一時孝宗登極奉詔如浙江祭禹穴郡邑餽遺悉峻却之以失朝參出

爲興國州州判遷安順知州安順在南夷坤順其俗爲緩輯民夷安之遷衡州府同知超拜山西按察僉事兼督河南等處屯田多所釐剔王恕在吏部議將內遷而坤已得疾不起坤慷慨喜功名顧仕輒齟齬而靜重有守家清約至無資以

遺後

鄧志

郁容字弘德成化甲辰進士授刑部主事都御史秦紘與安遠侯柳溥以事交訟於朝久不決尙書何喬新屬容讞之容直紘抵溥於罪陞員外郎御史李興出按陝西坐濫刑下獄巨璫楊某欲坐興死容援法爭興得末減楊謂容右興調撫州府通判陞澧州知州豪右冒法治之不少假擢雲南僉事所

部產金每銷礦金戶率有例入容禁絕之蠻賊阿則聚山谷爲亂容以計散其黨卒就擒丁母憂歸卒子勳以進士知華

容縣亦清謹

鄧志

孫艾字世節父紀官刑部員外郎艾任俠父喪致十郡客來弔盡傾其家學詩於沈周與崑山周詩長洲吳寬皇甫冲兄弟友善鑿山得美泉剗崖石緣高下結廬以待游者篤故舊周窮乏坐此家益貧自號西川翁有詩集若干卷子舟耒舟進士官工部主事耒子七政字齊之七歲能詩與王世貞汪道昆諸人遊才名籍甚所居西爽樓清暉館蓄古彝鼎書畫客至觴咏其中晚年貧甚皆割去著松韻堂集行世二子林森

皆能詩森舉萬歷丙午鄉試官至高州同知有映雪山居集

錢志

盧翊字鳳翀父琮海陽令有廉操嘗平反死罪二十人以直道忤其守罷官翊弘治庚戌舉進士授新喻令政尚簡易以治聞內艱服闋知獲嘉縣里豪久負稅挾刃自衛翊捕寘於法租遂入縣有屯卒調自澤州其千戶橫邑中翊持其骹法事千戶叩首謝以薦拜御史出理山東軍政再巡按廣西當搖撞竊發兵疲民敝翊加意撫輯柳度叛亂被旨錄戎功劉瑾擅國以苛刻取賂會省城火論翊與三司失救罪時已遷湖廣僉事猶不免罰又以功冊稽緩爲罪停其官瑾敗復職陞

任川南兼視水利疏鑿都江堰以灌民田歲連大熟天全六番招討司所統碉門土軍以重斂作亂蜀中大震鎮巡官議進兵翊以爲非計乃屬翊招撫之皆詣軍門降瞿塘千戶徐啓夷種也白晝行劫官兵追之深入險阻翊訪其所善指揮某誘而縛之遂伏法遷副使守禦松潘其地介羌戎爲全蜀屏蔽松守卒自成都調分諸戍勞逸不均卒怨多逃翊爲定更戍法又嚴衛長斂索之禁其亂始弭自小河抵棧閣久廢壞商旅不通翊調工治之土人名爲盧崖閣龍州之西有鐵索橋土官叛亂多斷橋以守兵不得進翊命益其索而上施之板行者稱便遷雲南參政賓州洱海之界有鐵索菁夷諸

熟夷爲寇輒導之入擾時方議剿翊條其利害謂夷未易殄請於姚安界中創大堡擇將率其屬以守仍諭各堡堅城濬川夷竊發則相狙擊使生熟夷不得合可以取勝遂用其議一洱海雲南之西常苦旱其地有品甸開砦二陂可以儲水安南坡諸處有美泉可灌溉翊諭民治二陂築梁王山壩障水以入田歲比登公私有儲粟遷廣西右布政使尋卒年六十六翊器度弘裕是非不苟歷官久而門閥蕭然不異寒窶所至以君子目之

鄧志

周炯字光宇少撰萬言書欲上父木抑止之弘治庚戌舉進士授工部主事監稅浙江進員外郎郎中時羣瑞用事費官物

無藝炯按籍以給視其可緩者輒移停之爲羣小所怨會西番叛詔五月出師事起猝遽炯調軍械整暇如常時一日劉瑾令官校來問虞衡司所峙戎器幾何炯告以數藏於庫蓋瑾已有逆志故語塞之如此遷雲南右參議麗江軍民府爲羈縻郡巡歷所不及巡按張璞屬炯諭下之知府木定以貨餽炯峻却之定再拜願盡力守邊十八寨久弗靖邊臣議征之炯獨持不可後卒如其議所全活甚衆遷右參政職理戎伍撫臣薦炯才命督糧儲兼理鹽法剷除姦弊甚多久之轉陝西苑馬寺卿遷山西右布政使轉左首禁官買病民數事同僚多不便按部御史所遣人有擾州縣者炯治之御史遂

撫他事劾炯炯適以父喪歸他日御史言炯治狀方召用已卒矣

鄧志

時中字大本弘治庚戌進士知絳州絳有宗藩號難理中端己以治皆斂飭無干法者擢南京工部員外郎絳民遮道送車不得行在部時中官有因役入賂中發之外艱歸服闋補刑部凡擬案多自爲之吏無所容其姦累辨枉抑以能稱陞山西按察司僉事爲劉瑾所誣貶衡州府通判陞嚴州府同知瑾誅復舊職奉勅飭廣東清遠兵備猺獞寇連州中率兵討平之陞副使備兵海南黎據峒險常出抄掠畏中威惠莫敢肆指揮徐某獲罪暮夜懷金請免中執而治之中性簡易治

尚清嚴所至有聲

鄧志

褚圻字弘望父璵以鄉薦官國子博士有學行圻弘治癸丑舉進士授刑部主事遷員外郎慎於聽讞有寃濫必申之不以成案爲難湖廣參將趙晟殺指揮某其家訴於朝圻往鞫之圻知晟力能移獄兼程以至按論晟死擢知寧波府舉荒政修廢堰建小學逆瑾索貨外郡圻拒之遷廣西按察副使尋致仕

鄧志

鄒韶字性之弘治癸丑進士授南京工部主事革蘆鈔宿弊部委督磚運於儀真簡靜不擾晉刑部員外郎擢吏部郎中遷兗州知府訟牒紛委剖決如流逆瑾亂政遣卒四出偵事取

賂韶遂疏懇致仕初瑾欲逮韶而韶得請去乃摘二罪俾以米贖不愜復加譴令再贖瑾敗得免以薦擢山東左參政命下而韶已卒弟武字靖之弘治甲子舉人歷官潯州知府亦以靜退稱

鄧志參管
龔二志

蔣欽字子修常熟人弘治九年進士授衛輝推官擢南京御史數有論奏正德元年劉瑾逐大學士劉健謝遷欽偕同官薄彥徽等切諫瑾大怒逮下詔獄廷杖爲民居三日欽獨具疏曰劉瑾小豎耳陛下親以腹心倚以耳目待以股肱殊不知瑾悖逆之徒蠹國之賊也忿臣等奏留二輔抑諸權奸矯旨逮問予杖削職然臣思吠畝猶不忘君况待命在席目擊時

弊烏忍不言昨瑾要素天下三司官賄人千金甚有至五千金者不與則貶斥與之則遷擢通國皆寒心而陛下獨用之於左右是不知左右有賊而以賊爲腹心也給事中劉蕈指陛下闇於用人昏於行事而瑾削其秩撻辱之矯旨禁諸言官無得妄生議論不言則失於坐視言之則虐以非法通國皆寒心而陛下獨用之於前後是不知前後有賊而以賊爲耳目股肱也一賊弄權萬民失望愁嘆之聲動徹天地陛下顧懵然不聞縱之使壞天下事亂祖宗法陛下尙何以自立乎幸聽臣言亟誅瑾以謝天下然後殺臣以謝瑾使朝廷一正萬邪不能入君心一正萬欲不能侵臣之願也今日之國

家乃祖宗之國家也陛下苟重祖宗之國家則聽臣所奏如其輕之則任瑾所欺疏入再杖三十繫獄越三日復具疏曰臣與賊瑾勢不兩立賊瑾蓄惡已非一朝乘間起釁乃其本志陛下日與嬉遊茫不知悟內外臣庶凜如冰淵臣昨再疏受杖血肉淋漓伏枕獄中終難自默願借上方劍斬之朱雲何人臣肯少讓陛下試將臣較瑾瑾忠乎臣忠乎忠與不忠天下皆知之陛下亦洞然知之何仇於臣而信任此逆賊耶臣骨肉都銷涕泗交作七十二歲老父不顧養矣臣死何足惜但陛下覆國喪家之禍起於旦夕是大可惜也陛下誠殺瑾梟之午門使天下知臣欽有敢諫之直陛下有誅賊之明

陛下不殺此賊當先殺臣使臣得與龍逢比干同遊地下臣誠不願與此賊並生疏入復杖三十方欽屬草時燈下微聞鬼聲欽念疏上且掇奇禍此殆先人之靈欲吾寢此奏耳因整衣冠立曰果先人盍厲聲以告言未已聲出壁間益悽愴欽嘆曰業已委身義不得顧私使緘默負國爲先人羞不孝孰甚復坐奮筆曰死卽死此橐不可易也聲卽止杖後三日卒於獄年四十九瑾誅贈光祿少卿嘉靖中賜祭葬錄一子

入監明史 錢志南都賜諡忠烈又龔志欽父綺通經博古欽歿後尙善飯享年九十有六

吳寅字敬夫弘治乙卯舉人授武昌同知巨盜劉七殘河汴官捕之急入於鄂民皆逃迸寅調戰守具民以無恐巨盜趙璫

變形服匿境內寅設計擒之械致於京再遷河東都轉運使同知凡為鹺司多損譽寅涖職謹名特起御史與寅不咸加攬劾寅亦奏辨竟解職還單車上道至無以為行鄧志曾孫士

志字伯高父歿哀慟常絕而復蘇踰小祥目失明耳失聰口


失音血枯骨立見者以為人腊免喪未幾卒錢謙益傳 按謙益於孝子傳

內附載寅事謂寅率舟師射殺劉六與史傳鄧志俱不同

錢仁夫字士弘號東湖少學於邑人陳九疇聞性理之學弘治己未舉進士時年五十四矣或勸減年以便仕進仁夫曰方仕而為欺罔乎授都水主事分司臨清領衛河提舉司兼理漕渠聞事會省冗官又兼理磚廠還朝改虞衡司故事輪役

匠免役出銀解部歲久匠戶亡耗過半而官徵不已里役以為累仁夫議請徵匠以補其缺悉蠲其舊負者會孝宗以逃匠問尚書曾鑑鑑對如仁夫議乃盡除無徵者監稅浙江還朝遷營繕員外郎逆瑾方竊政遂引疾致仕後瑾益張誣逮中外官一時清望皆不免人始服其明決性好客座常滿內行修謹與弟信夫友愛置粟義莊以助族人博綜羣籍為文雅贍詩和緩所著歸閒文纂八卷水部詩歷八卷善楷隸畫山水竹石有逸致鄧管二志合纂

丁仁字明德壯歲多病終日臥幃中以是該覽載籍弘治己未舉進士授行人陞司正正德中持節冊封慶符王藩府饋遺



皆峻謝陞南京屯田郎中蘆洲歲課銀二萬五千餘兩往時
 當司專出納仁請委吏受銀於堂廡郎中無所預擢廣西參
 議督糧餉歲大歉仁請糴粟於鄰省躬往監運軍餉獲濟賓
 州梗化民以聖塗屋自別仁使人敦諭州人素德仁不敢肆
 以疾致仕鄧志

唐天恩字堯仁常熟人弘治十一年舉於鄉授葉縣知縣正德
 六年盜起河朔天恩增城塹池繕修器械流賊趙璲徐彥明
 等騎馬千餘臨城天恩率兵奮戰擒戮數十人賊引去是歲
 十月劇盜劉七徒黨尤盛抵城下攻圍甚急天恩嬰城固守
 二十餘日外無強援城遂陷賊執天恩及其父政懸於縣庭

叢射殺之庶母任氏二妹皆遇害妻錢氏子詩臥亂屍下得

脫事聞贈光祿少卿賜祭蔭一子仍賜子孫為儒籍復其身

後巡按御史華珩疏請敕建專祠有司春秋致祭鄧管冀三志台纂

附見錢志天恩曾孫一麟母患痰疾幾殆一麟日夕焚香請代忽大笑數聲而卒卒三日而母愈

陳察字元習常熟人弘治十五年進士授南昌推官正德初擢

南京御史尋改北劉瑾既誅武宗猶日狎羣小察偕同官請

務講學節嗜慾勤視朝語甚切直以養親歸家居九年始赴

補會帝將親征宸濠察請無行而亟下罪己詔忤旨奪俸一

年諭羣臣更諫必寘極典俄巡按雲南助巡撫何孟春討定

彌勒州以功增秩世宗即位疏言金齒騰衝地極邊徼既統

以巡撫總兵又有監司守備分轄無事鎮守中官因劾太監
劉玉都督沐崧罪詔並罷還嘉靖初按四川請罷鎮守中官
不聽錦衣百戶王邦奇誣大學士費宏石瑋陰庇楊廷和將
興大獄給事中楊言抗疏諫帝震怒親鞫言落其一指察大
呼曰臣願以不肖軀易言命不忍言獨死帝目攝之察不爲
動退具疏申理且請下王邦奇於獄直聲震朝野巡視京營
與給事中王科極陳武定侯郭勛貪橫狀擢南京太僕少卿
疏辭因請召前給事中劉世賢等二十餘人帝怒責以市恩
要名貶遠方雜職給事中王俊民鄭一鵬論救皆奪俸察補
海陽教諭累遷山西左布政使入爲光祿卿十二年以僉都

御史巡撫南贛居二年乞休因薦前都御史萬鏗大理卿董
天錫等十四人可用吏部請從其言帝奪部臣俸責察徇私
妄作斥爲民察居官廉旣歸敝衣糲食而已明史弟寰字原大
正德辛未進士選庶吉士授檢討大內災上書勸修省奪俸
半歲謝病歸嘉靖初召仍前官預修武宗實錄請復古左右
史記言動又請爲建文諸臣立傳不報遷南京國子司業改
北時議罷孔子王號言者遂欲併殺文廟器物寰持不可曰
陛下稱孔子爲先師蓋尊之也尊之則闕里制當益不當裁
上是之俄陞南祭酒尋致仕歸寰清操不及其兄而近情勝

之有琴溪集十二卷


管志參陳祖
范昭文新志

顧達字德孚舉進士授臨川令運軍恣橫達疾驅入縣拘其已
 兌者每石予耗三升以其餘抵正兌二萬餘石裁驛遞辨疑
 獄為士民所稱布政司役蔡堂數撓縣政達得其攬納鹽鐵
 姦賊事論成堂屬守備姚太監求解達不從庫有羨銀二千
 餘兩吏毛昌夜獻之達罪昌而以銀解刑土簿申屠祥因事
 入賄不納行謗於巡按御史奏調龍泉教諭未幾遷魯山令
 陞南京刑部主事持法平恕遷郎中卒鄧龔二志合纂
 丁奉字獻之號南湖少孤力學舉進士授南京文選主事晉驗
 封郎中丁內艱歸有旨擢用吏部尙書陸完手書促赴奉反
 致書完勸其功成身退遂以原官致仕年方三十八耳其後

完敗交游多株連奉以前書免於累士論高之已乃沈酣六
 籍著五經臆言四十卷通鑑節要五十卷南湖留槩十二卷
 巡撫歐陽鐸餽金刻其集奉念故友湯繼文五喪未舉即以
 賻之管龔二志合纂

鄒泉號嶧山錢志字子靜少美風儀長而有聲庠序間訓誨諸生精

研書義游其門者多取科第晚棄舉子業著書澗谷山中有
 四書折衷翼衷口義會粹詩經約說經世格要尙論編宗聖
 譜梓行於世巡按御史甘士价造其廬咨訪古禮稱為吳與
 弼之流卒年七十餘無子管志
 湯繼文字引之正德辛未進士授南京兵部主事進員外郎郎



蘇州府志 卷六十二
中奉職詳慎多所釐革官校恣橫繼文痛抑之有勲貴抵法
當戍邊資緣請脫繼文執不從陞福建參議分守建寧諸郡
臨事不少回假閩連歲稔軍儲告缺詔蠲民租值有秋科臣
議將加征繼文言詔旨不可違軍儲當別措卒從其議長樂
有豪據紫陽書院繼文勒還之讞獄必期得情輒行駁有慮
囚使者臨境有司以成案爲言繼文曰拘案斷而故入人罪
可乎抗論得白者甚衆遷湖廣副使分巡湖南時衡永多盜
警繼文謂吏失職則民失業盜所由起命有司緩征節費和
糴以賑仍戒守將固守要害毋黷武以覲功盜旋平以巡歷
冒春瘴得疾卒

鄧志

王舜漁字于澤正德丁丑與兄舜耕同舉進士授工部主事分
司浙江倖臣江彬方用事中官以賂得預司事怙權橫征舜
漁以法裁之課入命貯錢塘仁和二縣庫鎔銖無所與宸濠
反浙江鎮守太監畢真謀應之巡按御史張縉知舜漁忠略
移司入城與謀議真一日召縉與舜漁飲將戕之座上舜漁
帥土兵千餘人以從見兵械森列詰真曰豈備寧藩耶正當
設於城上耳命左右立撤之酒半日縉先行引觥與真痛飲
而出真氣索改刑部歷員外郎遷山東僉事督武定兵備州
方有警舜漁修軍政躬習騎射知州姚遜貪暴劾罷之丁外
艱歸服闋補原官分巡遼海東寧道修築邊牆延袤千里有

蘇州府志 卷之二十二
挾中官勢擅支諸衛俸給者舜漁捕寘於法豪猾持官長短
結黨攫財者亦遣戍極邊一道震懼遷副使整飭臨清兵備
遼人數千泣送有圖其像而去者臨清當道衝弊究所窟穴
舜漁訓練士卒安撫商賈上下頌其治巡河郎中在臨清繫
囚五十餘人久不決舜漁察其寃命釋之又按考州庫贓罰
銀有隱匿舜漁持之急遂摭他事許奏詔令二人候勘於家
舜漁事得白吏部方擬薦用無何卒年四十七舜漁有宏才
應變處艱不見聲氣風神明爽議論英發假之年勲名未可
量也鄧龔二志合纂 管志云舜漁兄舜耕字于田初任廬
陵知縣擢御史巡理長蘆鹽法上便宜七事自是鹽政
疏通再巡按河南謝絕請託歲大旱減損廚
傳餽遺人多銜之謫光州判官改濱州卒

陳迥字良會宋溫州教授元大後正德丁丑進士除惠安知縣
調福清擢御史同官朱澍馬明衡疏言昭聖皇太后生辰不
宜免朝賀帝怒下詔獄拷訊迥繼諫帝愈怒廷杖下獄謫合
浦主簿時王守仁總督兩廣檄所屬選諸生之俊拔者聘迥
爲師講道靈山書院起知新喻縣再遷大名府同知尋陞福
建僉事備兵福寧道古田相傳礦發羽書旁午處州民操刃
來爭迥引兵入深阻俘賊黨封其山遷河南副使帝幸承天
迥扈駕中官要賄不得坐供具不辦下獄爲民後以九廟告
成恩復元官撫按交薦不起家徒壁立所著有石淙漫槩明史

參新舊
縣志

鄧韞字文度本姓蔡少育外家因氏焉爲諸生時博綜經史負
文望知縣楊子器以爲絕倫嘗遺以俸錢又命巨室葺其廬
韞咸謝不受正德丙子舉於鄉累上春官不第遂棄經生業
闢一室於母寢之右以圖籍自娛尤好宋儒書每旦必肅衣
冠焚香盥手而後讀之爲文有體要歸有光陸粲皆稱之撫
按重其品卽其家建尙志坊嘗倣呂成公大事記論次古今
得失類成卷帙曰如有用我執此以往年八十八卒所著常
熟志十三卷又有濮州志易解泉坊議事錄畫筆亦蒼秀子
廷薦字臺山詩宗王孟畫亦工密

先賢事略列朝詩
集新舊志合纂

顧玉柱字臺卿常熟人嘉靖壬辰進士由南京工部主事改北

進郎中外艱服除補刑部值春祈穀坐失陪祀謫道州同知
有異績遷平陽府通判尋陞代州知州歷河間府同知擢大
名知府遷山西副使庚戌秋俺荅入塞玉柱適以慶賀入都
被命監軍時變起倉猝士伍搶攘玉柱躍馬馳塵埃中忽得
頭暈疾會嚴嵩亦以他事賺之遂致仕性故伉直喜任事知
常熟沈弘彝以邑產沃瘠不同嘗計畝定稅三則其豪長者
不無詭匿玉柱議更度田攤稅乃躬行阡陌手操尺量而圖
之雖民譁議格然賴其首發奸弊匿田稍稍得清倭警首捐
金助築城役及倭薄城下堅守東南隅身冒矢石散粟予編
伍佐知縣王鈺議守白茆三丈諸浦俱有策略居恒好談古

節俠事抵掌慷慨恨不一致身其間

王志堅府志彙

盛賚汝字以善冒母王姓登嘉靖辛卯鄉薦任增城知縣增城陸接五嶺多寇盜水通海縮瓜哇三佛齊滿刺加諸國之利靈山諸峒蠻阻險竊出行劫賚汝廣設方略偵候精明賊不得出會督撫討羅山叛徭使賚汝監藍水軍劉智山者賊謀主也賚汝先擒斬之躬率營兵疾鬪而前追北數百里擄獲無算詔賜白金故事諸夷以寶貨至者監司命有司檢錄入其奇珍然後市易謂之抽盤賚汝三閱貨三却之夷感其德以驪珠象壺流離盃爲壽又不受夷人益喜釀金樹榷署曰却金督撫上其治行當內徵嚴世蕃索賂不得惡之會崖州

知州葉某爲政苛燒生熟二種黎結連爲寇朝廷不能討世蕃乃命吏部以賚汝知崖州至則移書屬邑結伍保收散亡稍稍復業黎歲當輸寶布粟米一切以權宜罷之惟嚴守備禁鹽不得闌出與黎市而已黎民旣不奉吏法其酋號土舍者不能統治爭田畜相仇殺賚汝遣譯諭降其土舍用其故俗使殺人者出耕牛爲償牽犬臨水厓斬頭噍血相誓解仇旣詛盟土舍還報黎人大喜輸租纒屬旬日致數千石生黎活羅本萬等聞其威信願歲輸貢比熟黎劇賊陳廷魁阻險出掠賚汝授策巡撫袁士奇誘斬之海南兵備王惠急責沈水香賚汝拒之曰前州守以徵香木絳禍於黎至今未弭下

吏若私銖兩及以賂上官者有如大海稍遷開封同知周府儀賓與倡狎復有私倡者憤而殺之藩府行金歸獄於倡家婢李梅花數年不決賚汝一讞得實黃河暴溢築堤三百餘里捍之擢漢陽知府湏水填淤梗行賚汝出府羨金疏鑿漑田千餘頃名曰盛公河劉公洲賊千人阻江為寇賚汝督兵擣其巢俘斬賊首科臣張崇倫受賊賂屬勿窮竟賚汝荅曰天子任公言天下是非不任公為逋逃主也竟為崇倫誣劾免官家居貧困以卒

先賢事略 舊府志有許河字水東與賚汝同舉於鄉知浦江上蔡兩縣創築

石城祀名宦以無事蹟附見於此

錢泮字鳴教嘉靖十四年進士知侯官縣調繁慈谿擢刑部主

事歷員外郎郎中出知順慶府遷陝西副使備兵漢中嘗發粟賑饑全活甚眾後陞江西參政丁父憂既歸而倭亂作邑令王鈇善騎射時從泮把酒談兵泮有兩蒼頭亦善射倭自吳門劫關稅巨萬奪民船載之取道尚湖入江泮與鈇率兵追至讓塘猝與倭戰伏四起遂俱遇害事聞詔贈光祿卿諭祭建祠蔭一子錦衣百戶世襲

管志參龔志 錢志時有徐察統家丁百人拒賊三

丈浦生擒韓龍三大王法智等斬獲甚眾王錢之難察亦死之詔贈官蔭子察恪之後也

趙士端字叔正以歲貢授仙居訓導倭寇仙居令被害知士端為學博也將釋之士端瞋目大罵倭斷其首止以身歸葬

錢志

顧坤別號心田母病割左臂肉作羹以進母愈又二十年母卒

廬墓三年嘉靖間詔旌其門

龔立本曰有明邑人之以孝聞於朝者獨坤一人耳

嚴訥字敏卿常熟人嘉靖二十年進士改庶吉士授編修遷侍讀三吳數中倭患歲復大禋民死徙幾半有司徵斂益急訥疏陳民困請蠲帝得疏感動報如其請尋與李春芳入直西苑撰青詞超授翰林學士歷太常少卿禮部左右侍郎改吏部皆兼學士仍直西苑所撰青詞皆稱旨禮部尚書郭朴遷吏部遂以訥代之朴遭父喪復代為吏部尚書嚴嵩當國吏道汙雜嵩敗朴典銓猶未能盡變訥雅意自飭徐階亦推心任之訥乃與朝士約有事白於朝房毋謁私邸慎擇曹郎務抑奔競振淹滯又以資格太拘人才不能盡倣先朝三途並

用法州縣吏政績異者破格超擢銓政一新尋錄供奉勞加太子太保四十四年袁煒罷命兼武英殿大學士入參機務以代者郭朴未至仍掌銓政帝齋居西苑侍臣直廬皆在苑中訥晨出理部事暮宿直廬供奉青詞小心謹畏至成疾久不愈其年冬十一月遂乞歸踰年世宗崩遂不復出訥既歸里父母皆在晨夕潔餐孝養人以為榮家居二十年卒年七十有四贈少保諡文靖

明史 縣志訥子治澂澤治字道隆隆慶丁卯舉人官中書舍人操守甚峻澤字開宇太學生仕至中書舍人為人豪侈好義激自有傳

瞿景淳字師道常熟人八歲能屬文久困諸生間教授里中自

給嘉靖二十三年舉會試第一殿試第二授編修鄭王厚烷

以言事廢徒鳳陽景淳奉勅封其子載堉爲世子攝國事世子內懼贖重弊景淳却之時恭順侯吳繼爵爲正使已受幣慙景淳亦謝不納旣而語景淳曰上遣使密詞狀微公吾幾中法滿九載遷侍讀請急歸江南久苦倭總督胡宗憲師未捷景淳還京謁大學士嚴嵩嵩語之曰倭旦夕且平胡總督才足辦南中人短之何也景淳正色曰相公遙度之耳景淳自南來目覩倭患胡君擁師十萬南中人不得安枕臥相公不欲聞誰爲言者嵩愕然謝之歷侍讀學士掌院事改太常卿領南京祭酒事就遷吏部右侍郎隆慶元年召爲禮部左侍郎用總校永樂大典勞兼翰林院學士支二品俸侍經

筵修嘉靖實錄疾作累疏乞骸骨踰年卒贈禮部尚書諡文懿爲編修時典制誥錦衣陸炳先後四妻欲封最後者屬景淳撰詞不可介嚴嵩爲請亦不應橐金以投卒笑謝之子汝稷汝說汝稷字元立好學工屬文以蔭補官三遷刑部主事扶溝知縣扶宗人神宗令予重比汝稷曰是微服至邑庭官自扶扶溝民耳獻上竟得釋歷黃州知府徙邵武再守辰州永順土司彭元錦助其弟保靖土司象坤與酉陽冉御龍相仇殺汝稷馳檄元錦解兵去三土司皆安等遷長蘆鹽運使以太僕少卿致仕等卒

縣志汝稷性嗜宗門書撮其要旨爲指月錄

汝說字星卿

五歲而孤搆文成輒跪薦父木主前萬歷中舉進士官至湖

廣提學僉事亦以剛正聞

王志堅稟汝說初為營繕主事都水員外郎工曹日與宦者相接而

商賈緣為姦利是時營辦百端汝說條理精密動引故事為据羣閹口爭於前終無所假借所省以億萬計又考百年間供億盈縮之數彙而成書至今賴之督學政時所進退士雖有勞如山不可撓所著有皇明臣略百卷

子式耜

別有傳

明史

徐棡字世寅嘉靖丁未進士除宜春知縣擢南京御史時京山

王宗茂者同被命瀕行巖嵩置酒餞之備極珍異宗茂多不

能名棡微笑曰海外物也若何由名後宗茂極論嵩父子其

疏草嘗從棡更定有設宴而水陸畢具皆海外物等語蒿恨

之謫棡浙江都事遷饒州同知擢浙江僉事進參議監戚繼

光軍破江西羣盜丁內艱歸服闋補河南轉湖廣提學副使

遷雲南參政進按察使轉山東布政使尋擢應天府尹未上

拜右副都御史巡撫江西疏言饒困於饑其猩紅尤不易得

朝廷淺其色而減其數晉南京工部右侍郎山東漕河淤議

開海運棡被命督膠河工未竟改兵部右侍郎巡撫浙江修

築海鹽堤二十餘里入為刑部左侍郎拜南京工部尚書時

張居正以奪情怒言者棡以書規之未幾罷歸棡數歷中外

為政務捍禦災患師事嚴訥其恭謹頗相類居家孝友恤故

舊有文集奏議及纂補大學衍義行於世

龔錢二志合纂

錢之選字舜臣父表以事繫獄之選日走控上官莫能解乃代

父繫獄父遠愬京師母卒於家泣懇差押視含殮夜復就繫

居囹圄手一編呶唔不輟父歸出獄則又躬樵採以供父朝夕迨父戍遼東之選隨往有千戶延為師遂補鐵嶺衛諸生嘉靖庚戌成進士授晉江知縣以搏擊為治為巨姓所螫調固始縣遷刑部主事改兵部進郎中上書訟父冤得雪封父如其官遂告終養父子衣繡還鄉吳中傳為佳話其閑家甚苛官刑部時視獄未歸妻妾在邸值風烈損封識妻妾同侍婢皆惶懼自縊後御姬媵益苛重足屏立多不良死鄉邦忿之然孝行甚高自不相掩

王志堅府志彙

錢有威字惟重常熟人後遷長洲為諸生時其制舉義即為同儕所誦習嘉靖庚戌成進士授行人陞刑部主事裕邸有闖

奴犯法大璫李素懷以私憾縛闖屬有威窮治時景王未之國中外危疑有威謂奴罪不及主必引繩批根浸淫及裕邸為不便乃抵奴罪寘闖不問素懷恚甚構蜚語中傷謫德州判官遷登州通判攝府事文登巨豪相聚竊礦縣官不能制遽以反告有威曰何事張皇亟草檄諭渠魁自縛詣吏餘悉貰不問豪黨賂所親求解不得忌者遂以是誣有威時已遷南京刑部郎中猶中以考功法罷有威坦衷熱腸遇人有急嘗傾身為地入仕籍十九年囊無餘蓄年八十四無疾而終所著有廣川集

申時行誌參縣志

邵圭潔字伯如世居虞山北麓學者稱北虞先生瞿景淳嚴訥

輩結社會文時稱十傑圭潔爲領袖孫樓其高弟也工制舉業策論尤攻練詩文不斤斤繩削而清婉淒切參軌名家嘉靖己酉舉於鄉五上公車不第選德清教諭卒爲人篤行孝弟留心經濟倭亂邑令王鈇造廬問計上築城四策城賴以全所著有北虞集若干卷子鏊字麟武萬歷丙戌進士仕至兵部郎中

龔錢二志合纂

孫樓字子虛舟之孫嘉靖丙午舉人選湖州府推官有文學爲吏非其好也然公廉嘗攝郡政捕論璿璣村巨盜一郡帖服改漢中遂致仕歸性好書杜門較讐晝夜不輟所藏踰萬卷略無脫訛燕集諧謔四坐盡傾或以滑稽寓之文章爲古文

詞法歐蘇而不竟其才所著詩文及吳音奇字行於世

龔志

陸一鳳字子韶潤曾孫嘉靖壬子舉人授泉州府同知泉故瀕海歲屢中倭一鳳簡勁卒爲水寨戍之以艤艫翼其外旣而他海舟皆以颶敗而一鳳所部獨全尋偕諸將討海寇林鳳大破之覆其巢詔賜白金一鎰凡三署府篆四攝縣事以至清戎籍理屯政課鹽法俱能舉職以勞瘁卒於官所著有三禮奧義孫崇禮萬歷戊戌進士平陽知縣問禮萬歷甲辰進士南贛巡撫

管錢二志合纂

陳瓚字廷裸常熟人嘉靖三十五年進士授江西永豐知縣治最擢刑科給事中劾罷嚴嵩黨祭酒王才諭德唐汝楫遷左

給事中劾文選郎南軒請錄建言廢斥者帝震怒杖六十除名隆慶元年起官吏科請卹楊最楊爵羅洪先楊繼盛而誅奸黨之殺沈鍊者帝可之楊順路楷皆逮治其冬擢太常少卿初徐階當國雅重瓚時與密議瓚亦侃侃自將既而高拱與階相搆喉御史齊康劾階瓚與諸言官交論之康坐黜拱亦去位三年冬拱再入瓚已移疾歸竟坐浮躁謫洛川丞不赴萬歷初張居正柄政又以瓚前論止大閱有侵居正語亦惡之不召居正死始以薦起會稽縣丞五遷復故官再遷左副都御史會大計羣吏瓚堅執可否當事者畏之踰月進刑部右侍郎尋轉左時稽勲郎顧憲臣以疏論時弊謫官瓚責

大學士王錫爵曰憲成疏最公何以得譴錫爵曰彼執書生之言徇道路之口安知吾輩苦心瓚曰恐書生之言當信道旁之口當察憲成苦心亦不可不知也錫爵默然瓚前後忤

執政如此未幾卒官贈右都御史諡莊靖

明史參縣志

王嘉言字君謨嘉靖壬戌進士授肥鄉知縣一夕斃三猾胥解散鹽盜洗手奉職踰年大治外艱服闋再補曲周擢工部主事改南禮部歷郎中擢浙江僉事備兵寧紹台儲糗糧練士卒島倭突入嘉言縛其魁六人斬首三十餘級詔賜白金一鎰遷參議移駐溫處處多礦盜嘉言撫諭悉散去再賜金幣

引疾歸

錢志

錢順德字道充舉嘉靖乙丑會試隆慶戊辰釋褐授刑部主事
歷郎中初徐階論死都御史楊順御史路楷天下稱快高拱
再起欲釋此兩人順德白尚書母署名牘尾尚書慚恚屬他
郎出知常德府平徭賑饑流民復集母喪歸補知興化府歲
旱禱於蟹眼泉應時得雨遷浙江副使調山東致仕兄順時
字道隆嘉靖己未進士奉命餉遼軍給假歸卒年甫二十九
順時倜儻有大志講求天文律歷河渠兵農諸家之學旁獵
醫卜方技無不該洽子世揚字景行年十三能闇記經史數
萬言好談古今忠節奇偉事嘗戒子謙益以三不朽自勵毋
以三不幸自徃著古今談苑行於世

錢志

何鈞字子宣才識通敏好談經世大略嘉靖乙卯舉於鄉除浙
江平陽知縣平陽有東西江灌田四十萬畝而海水流注田
爲斥鹵鈞修築鳳浦埭以捍之歲輸永嘉蒲門軍糧涉江踰
阻民苦其勞鈞請折銀皆垂永利又行視甌江防倭要害築
石堡二爲營房百二十以居戍卒繕置守備縣境帖然歷官
淮府長史致仕尚寶徐貞明開畿南水田貽書詢鈞報言國
家兵屯鹽漕四政皆表裏水田田邊地之法四曰清舊屯重
邊引廣招募隆賞功田內地之法三曰貴力田更納贖淮徭
役定流配田畿南之法三曰近山用閩人汲泉法近河用楚
人障陂法近海用吳人引潮法鑿鑿數萬言皆可施行會尚

寶議格而止

本錢謙益誌

蔣以忠字伯孝隆慶戊辰進士授長樂知縣政尚廉靖邑有濱閭二湖灌田千頃為豪猾竊據以忠執下於理大加疏濬民賴其利陞南京刑部主事有闖僞稱選良家子充後宮部使者覺而執之闖託權貴關說以忠不為動竟論死進郎中外艱歸服除再補刑部有尚書子使酒殺人以忠不阿亦論死遷廣平知府廣平高阜苦旱民飢為盜以忠建閘置倉經理荒政盜為衰止遷福建副使未上卒以忠居官廉介內行修

潔有文名所著有藝圃球琳清權山人集

管志

用賢字汝師常熟人父承謙廣東參議

縣志承謙字德光釋褐贛州推官擢南吏

部主事晉郎中遷參議為人魁岸倜儻不可免以非義當銓考滿時嚴世蕃聞其名使索數百金為贄曰君良苦不當為南官我能為地承謙笑應曰犬馬齒長不任公事且安所得金竟謝去

用賢舉隆慶五年進士選庶吉士萬歷初授檢討張居正父喪奪情用賢抗疏曰臣竊怪居正能以君臣之義效忠於數年不能以父子之情稍盡於一日臣又竊怪居正之勲望積以數年而陛下忽敗之一旦莫若如先朝楊溥李賢故事聽其暫還守制刻期赴闕庶父子音容乖隔阻絕於十有九年者得稍伸其痛於臨穴憑棺之一慟也國家設臺諫以司法紀任糾繩乃今曉曉為輔臣請留背公議而徇私情蔑至性而創異論臣愚竊懼士氣之日靡國是之日淆也疏入與編修吳中行同杖六十除

名用賢體素肥肉潰落如掌其妻腊而藏之用賢有女許御
史吳之彥子鎮之彥懼及深結居正得巡撫福建過里門不
爲用賢禮且坐鎮於其弟下曰婢子也以激用賢用賢怒已
察知其受居正黨王篆指遂反幣告絕之彥大喜居正死之
明年用賢復故官進右贊善江東之李植輩爭嚮之物望皆
屬焉而用賢性剛負氣傲物數訾議大臣得失申時行許國
等忌之會植東之攻時行國遂力詆植東之而陰斥用賢中
行謂昔之專恣在權貴今乃在下僚昔顛倒是非在小人今
乃在君子意氣感激偶成一二事遂自負不世之節號召浮
薄喜事之人黨同伐異罔上行私其風不可長於是用賢抗

辨求去極言朋黨之說小人以之去君子空人國詞甚激憤
帝不聽其去黨論之興遂自此始尋充經筵講官再遷右庶
子改南京祭酒請早建儲宥言官李沂罪居三年擢南京禮
部右侍郎以吏部郎中趙南星薦改北部尋以本官兼教習
庶吉士二十一年王錫爵復入內閣用賢以爭三王並封語
侵錫爵爲所銜會改吏部左侍郎與文選郎顧憲成辨論人
才羣情益附錫爵不便也用賢故所絕婚吳之彥者錫爵里
人時以僉事論罷使其子鎮許用賢論財逐壻茂法棄倫用
賢疏辯乞休遂免歸戶部郎中楊應宿鄭材復力詆用賢請
據律行法都御史李世達侍郎李楨疏直用賢斥兩人讒諂

遂為所攻高攀龍吳弘濟譚一召孫繼有安希范輩皆坐論
 救褫職自是朋黨論益熾中行用賢植東之創於前鄒元標
 趙南星顧憲成高攀龍繼之言事者益裁量執政執政日與
 枝拄水火薄射訖於明亡云用賢長身聳肩議論風發有經
 濟大略蘇松嘉湖諸府財賦敵天下半民生坐困用賢官庶
 子時與進士袁黃商榷數十晝夜條十四事上之時行錫爵
 以為吳人不當言吳事調旨切責寢不行家居四年卒天啓
 初贈太子少保禮部尚書諡文毅縣志所著有松石齋集三
 吳文獻志國朝典章因革
錄子琦美字元度以蔭至刑部郎中博聞強記隆美字文度
 由刑部郎中出知叙州府嘗遣兵大破奢崇明奢安二酋士
 春士錦皆
 其子也孫士春士錦崇禎十年同舉進士士春字景之第

三人及第授編修明年兵部尚書楊嗣昌奪情視事未幾入
 閣少詹事黃道周劾之下獄士春上疏曰嗣昌墨纒視事既
 已罔效陛下簡入綸扉自應力辭新命乃閱其奏牘徒計歲
 月久近間絕無哀痛惻怛之念何奸悖一至此也陛下破格
 奪情曰人才不足故耳不知人才所以不振正由愛功名薄
 忠孝致之且無事不講儲才有事輕言破格非用人無弊之
 道也臣祖用賢首論故相奪情幾斃杖下腊敗肉示子孫臣
 敢背家學負明主坐視綱常掃地哉帝怒謫廣東布政司照
 磨祖孫並以攻執政奪情斥士論重之後復故官終左中允

明史

沈應科字獻夫隆慶辛未進士由沂州知州累陞廣西左參政致仕應科服官廉潔所至於民有德在沂州當凶饑後招集流民五千餘家時賦均徭鄰壤取法巡撫李世達於屬吏中獨賢應科其蠲積逋折馬價著為令多自應科條上費縣典史以賕聞應科廉知其枉言之世達世達曰已注下考矣應科曰吏有大小官評無大小也世達為揭吏部得免其相信如此家居三十年闔門掃軌年八十六卒

錢謙益撰墓表孫春澤字雨若能詩善草書畫竹為吳下名士後移家白門交游翁集嘗讀鍾惺詩集序而刻之病羸死

列朝詩集諸國本字首卿少時有嫠婦窺而悅之私饋以金國本辭金徙

舍以絕之為諸生都講所得贄脩悉取以奉母每日必具甘毳夜伺父母既寢乃入子舍母嘗苦痢昧旦往禱於周孝子廟門忽啓既卜得吉占從廟祝乞紫蘇少許以進母飲之病良已其後母又病復禱於周神忽見神左目流淚疾果不起其父歿未大殮天暴雨俗傳尸氣聞雷則腫國本跪中庭泣請於天雷即無聲將葬身臥壙中以占燥濕廬墓終喪

龔志

蘇州府志卷第六十二

蘇州府志卷第六十三

人物十七 常熟縣

明

黃時雨字化之萬歷甲戌進士除刑部主事遷郎中當張居正一切繩下時雨獨持平出爲惠州知府履畝清釐田賦免鐵稅八百餘兩禁女子市易御史王度死靖難子孫戍廣秦脫之岑岡夷長江月照者故剽寇李文彪黨也初王守仁破池仲容時岑岡獨嶮遠不可下文彪死月照代有其衆公行劫掠督撫遣兩指揮使招之月照答之百貫其耳使復命督撫怒命副總兵率師勦之時雨移牒陳不可願假歲月斬賊督

撫許之乃為手書令主簿邱懋入其巢瞰禍福月照謾言抵
 攔時岑岡私人遍左右伺官府動息時雨廉得四人把其重
 負令取賊自贖以方寸紙用府印書免死字使持歸賊巢給
 降者署名為信得三千餘人月照弗覺也既遣邱懋歸椎牛
 鳴鼓聚眾如平時無應者再鼓如前月照計窮乃挺身詣府
 及城闔服毒死斬首以獻散其黨為良民寇始絕擢廣東副
 使再平海寇李茂陳德樂之亂遷雲南參政乞歸養卒時雨
 天性卞直與人言蟬連不出口遇事明辨莫能奪持身廉在

粵十餘年不能自潤云

先賢事略
參錢志

陳國華字珍凡副使逅之孫萬歷甲戌進士授南刑部主事晉

郎中張居正柄政子懋修擢進士第一尙書吳某屬國華草
 賀啓辭以不能為四六語聞居正降東平知州東平故土城
 部議磔石民苦之國華奏請第深大其塹擒劇盜黃旛數決
 疑獄累遷廣州知府首行保甲連坐法市穀旁郡以濟旱飢
 政報最會有螫之者改調歸卒年九十子星樞字拱薇萬歷
 丁酉舉人知湯陰縣告歸養親以孝聞孫煌圖字鴻文少從
 楊廷樞受業崇禎壬午副榜授翰林典籍工大小篆著隸釋
 篆韻六卷詩集十卷從年隨筆六卷印可四卷
錢志參陳祖
范昭文新志
 顧雲程字務遠萬歷丁丑進士初任淳安縣調繁嘉興擢御史
 出為江西僉事歷霸州兵備至山東左布政整飭永平晉一

品服俸終南京太常寺卿雲程初涖淳安適歲凶撫按令禁
糴雲程曰遏糴非救荒策也但示販米者每十官買其一餘
勿問及在嘉興歲稔穀賤雲程故緩催科元旦問耆老曰穀
價視冬若何曰石益一鑲矣雲程曰如是趣完賦五日而畢
分巡九江時有景德鎮之亂藍芳威爲渠帥巡撫欲用兵雲
程議撫降之其後平哮平播芳威俱在行間爲時名將在貴
州安撫容山銅仁二苗在霸州稅使馬堂橫肆雲程繩之以
法居永平八年嚴禁搗巢邊無烽警龔志
王之麟字汝楨萬歷丁丑進士授刑部主事晉郎中遷撫州知
府內艱服闋補廣信府所在多惠政歷湖廣僉事山東參政

歲大饑力請蠲賑益都知縣吳宗堯疏論礦稅貪暴被逮繫
獄事下撫按會勘之麟第署宗堯不諳世故拙於保身士論
壯之中使嚴括庫藏東阿寧陽議以倉穀畀之之麟不可卒
於官子宇春字季和讀書纘言勇於爲人顧大章被闖禍宇
春冒暑求解傷暈道病卒錢志

陸枝字培吾世居畢澤萬歷丙子舉人知桐鄉縣廉平爲天下
最陞彝陵知州稅闖將抵荆爪牙吏恣爲奸利枝率州民追
而沈之闖不敢問遷平樂府同知致仕歸以孝友爲人矜式
者二十年年八十三卒錢謙益志

陸化淳字君復居五渠年十三縣令試化日中天論援筆立就

萬歷壬辰登進士授工部主事治泉濟上身行淖泥中導流決塞諸泉悉理晉郎中出知金華府義烏東陽開採不聊化淳邀礦使駐府授縣方略以得不償失報遂定全湖補價議革守礦兵省費以千數會義烏知縣忤司理誣縣不職上之巡按御史化淳力爭事得白御史入都列理刑罪狀奪其官化淳嘆曰我不能借屬吏婚當道忍以同官殉屬吏哉遂乞歸以薦起知贛州府郡政久弛庫帑虛額至三萬化淳發姦弊復其額屯軍橫暴出納多不如法典司者往往破產議以本屯軍卽支本屯糧著爲例贛有四郵郵道自南安而下宜從水乘傳者利其折入舍水從陸化淳請令馳傳至南安卽

止陸給其敏練如此竟以勤事卒官先是府通判以兩橋稅入羨金貯於府病革時以微言諷化淳曰無所藉此所著有松韻齋續集弟化熙字羽明萬歷癸丑進士授刑部主事晉工部郎中管器皿廠值光熹二宗婚喪相繼釐弊責實省金錢五萬督夏陽鎮河道開滿家壩漕艘得由湖入泲不經河險聞香賊起連陷鄒滕或勸移家赴臺莊化熙曰我奉命治河以護漕也我去而鎮事危矣鎮危漕安得獨完於是乞援兵塞隘口謹守望賊不敢逼淮徐兵至化淳遣淮兵營戚城徐兵營東關賊首劉翠華悉騎壓淮兵互有殺傷徐兵望而却走賊遂突入東關化熙單騎抵徐益請兵授計陳百戶乘

夜疾馳襲賊於朱公祠退保城會滕民擒翠華賊遂散化
熙無疆守寄而禦捍之功甚偉遷湖廣副使備兵武漢黃歷
廣西提學進湖廣參政未赴卒

錢志

翁憲祥字兆隆萬歷二十年進士爲鄞縣知縣課最入爲禮科
給事中以憂去補吏科疏陳銓政五事其一論掣籤法言使
盡付之無心則天官之職一吏可代苟爲不然則地本預擬
何必於大廷中爲掩飾之術請亟停罷時不能從故事正郎
不奉使撫按必俟代至是多反之而江西巡撫許弘綱以父
憂徑歸廣西巡撫楊芳亦以憂乞免代憲祥極言非制弘綱
貶官芳亦被責言者詆朱賡李廷機輒被譴憲祥疏論已勅

雲南巡撫陳用賓兩廣總督戴燿並不報是時大僚多缺人
憲祥言九卿俱曠甚傷國體因陳補缺官起遺佚數事報聞
屢遷刑科都給事中吏部尙書孫丕揚副都御史許弘綱以
考察爲言路所攻求去憲祥言一時賢者直道難容相率引
避國是如此可爲寒心旣而軍政拾遺疏爲錦衣都督王之
楨所撓久不下罪人陳用賓已論死疏亦留中憲祥皆抗章
論駁知縣滿朝薦李嗣善同知王邦才以忤稅使繫獄力請
釋之會冬至停決囚復請推緩刑德意宥纍臣矜楚獄帝皆
不報尋調吏科四十一年命輔臣葉向高典會試給事中曾
六德以論救被察官坐貶旨皆從內出憲祥力諫中官黃勳

趙祿李朝用胡濱等不法亦連疏彈劾久之擢太常少卿居

數年卒

明史 縣志憲祥弟愈祥字兆和萬歷戊戌進士授鄒平知縣人以少年易之愈祥發摘如神調知會稽

丁艱補清豐名爲稽勲郎中卒於道愈祥通籍數年蕭然然四壁嘗署其門曰苞苴未許誰人到清節惟應此戶知

嚴激字道徹訥次子清修雅尚以蔭仕至邵武知府按獄窮其

指蹤者治稅去其煩苛者闔爲稅使縱橫激收其檄闔奪氣

去築東壩開鷺絲池通九曲水舉一切利民事歸里後琴書

自娛湘簾斐几陳列古器座無俗賓口無俗語他如娶啞女

却冶童歸姻某產鉅萬皆人所難能者所著有雲松巢集松

弦館琴譜

錢志

陳禹謨字錫元瓚子萬歷辛卯舉人授獲嘉教諭累陞兵部郎

中遷四川僉事備兵川南長珙盜起夷亦煽動禹謨擒斬其

豪移檄諭降涼山夷石波等萬餘人尋遷貴州參議分巡清

都撫臣議勦下衛苗禹謨偵知平定諸夷爲之謀主誘斬之

遂分兵拔其寨寨凡二十一其一曰馬蹄寨有洞險阻賊所

窟穴用火攻殲焉叠石封戶鑱其石曰天焦紀功而還以一

參議專寄師旅所向克捷其功甚偉振旅入賀病卒於途贈

亞中大夫禹謨記問該博嘗撰左氏兵略以左爲經諸史爲

緯上於朝又輯駢志說儲經言枝指廣滑稽志補北堂書鈔

數百卷

錢志

管一德字士恒孤苦力學有聞於時萬歷辛卯舉鄉試第二中

丞顧益卿家居與一德談禦倭方略一德謂今國家之患恐不在倭河道尚書楊後山與談治河一德謂古來治河無百年之計而持文墨議論者往往計成敗於歲月今明公雖有端緒第恐數年間河徙不常而議論者復持其後矣屢上春官不第退而修常熟文獻志凡四年而成又著世家考瀝陽集經傳子史參同四書閱覽詩經閱覽等書錢志

顧雲鴻字朗仲中萬歷庚子鄉試年甫強仕而卒雲鴻少喪父拊心嘔血終身抱恹恹之疾事後母至孝雲鴻病後母籲天請代後雲鴻死旬月以哀卒後母之殉其子古未有也讀書虞山之藤溪博學深思研精六籍句字少有抵牾穿穴古今

訓故證明而後已生平耿介絕俗而急公赴義不顧頭目以忠孝名節為己任丁未鎖院對策至天災民窮淚簌簌下沾漬楮筆嘗語所知大丈夫殺身取義當轟轟烈烈如疾雷閃電公等暖姝自好他日縱遇難死節不過作文文山謝疊山耳江陰繆昌期長洲文震孟皆嚴事之曰朗仲吾師也學者私謚孝毅先生同時邵濂字茂齊治毛詩為大師善談名理吳越間學者宗之累舉不第病消渴死錢謙益吳中名賢表揚續議參列朝詩集徐待聘字廷珍棡從孫萬歷辛丑進士歷知樂清上虞分宜三縣皆有遺愛陞刑部主事轉工部郎中管節慎庫勾稽出入洗手奉職遷湖廣僉事分守荆南當奢僉驛騷繕兵庀餉荆

南晏然陞陝西按察使巡撫喬應甲希魏忠賢意追故侍郎王之寀賍期旦夕辦待聘故緩其獄與應甲抗不少屈尋引疾歸從弟待任字廷葵萬歷丙午舉人知沔陽州楚藩中涓殺人捕置諸法相國子奪民田視其質劑斷歸民會待調分守荆南當改調未行卒

曾倬志

顧大章字伯欽雲程子與弟大韶學生舉萬歷三十五年進士授泉州推官乞改常州教授父喪除值朝中朋黨角立正士日摧大章慨然曰昔賈彪不入顧厨之目卒西行以解其難余向與東林疏可以彪自况也乃入都補國子博士與朝士通往來陰察其交關肯綮清流賴之稍遷刑部主事天啓改

元進員外郎尚書王紀令署山東司事司轄輦轂最難任自遼陽失五城及京營巡捕日以邏紆細為事稍有踪迹率論死絕無左驗者二百餘人所司莫敢讞多徙官去囚未死者僅四之一大章言於紀曰以一身易五十人命且甘之矧一官乎即日會讞繫三人餘悉移大理釋放紀大嗟服佟卜年之獄紀用大章言擬流卜年未上而紀斥侍郎楊東明署事欲寘之大辟大章力爭卒擬流忤旨詰責竟論卜年辟瘐死獄中魏忠賢欲借劉一燾株累劉一燾大章力辨其非忠賢大恨

卜年一燾事具明史王紀劉一燾傳中

熊廷弼王化貞之下吏也法司諸

屬二十八人共讞多有議寬廷弼者大章因援議能議勞例

言化貞宜誅廷弼宜論成然二人卒坐死大章亦遷兵部去無異議也會王紀劾罷徐大化又疏刺客氏其黨疑紀疏出大章手恨之大化令所親御史楊維垣訐大章妄倡八議鬻大獄大章疏辨維垣四疏力攻言納廷弼賄四萬且列其鬻獄數事反覆詆訐不休大章危甚賴座主葉向高保持之下所司驗問都御史孫瑋等白其誣帝以大章瀆辨稍奪其俸大章遂引歸五年起官歷禮部郎中陝西副使大化已起大理丞與維垣爲忠賢鷹犬因假汪父言獄連及大章逮下鎮撫拷掠坐贓四萬及楊漣等五人旣死羣小聚謀謂諸人潛斃於獄無以厭人心宜付法司定罪明詔天下乃移大章刑

部獄由是漣等慘死狀外人始聞比對簿大章詞氣不撓刑部尙書李養正等一如鎮撫原詞以移官事牽合封疆坐六人大辟爰書旣上忠賢大喜矯詔布告四方仍移大章鎮撫大章慨然曰吾安可再入此獄呼酒與大韶訣趣和藥飲之不死投繯而卒崇禎初贈太僕卿官其一子福王時追諡裕愍初大章等被逮秘獄中忽生黃芝光彩遠映及六人畢入適成六瓣或以爲祥大章嘆曰芝瑞物也而辱於此吾輩其有幸乎已而果然大韶字仲恭老於諸生通經史百家及內典於詩禮儀禮周官多所發明他辨駁者復數萬言嘗以爲宋元以來述者之事備學者但當誦而不述將死始繕所箋

詩禮莊子曰炳燭齋隨筆云

明史 列朝詩集曰大章從父弟大武字武仲權奇倜儻以古

豪傑自命天啓中大章被急徵大武傾身入長安職內橐籥

一夕垣中白氣亘北斗大武故諳曉星象指而泣曰諸君子

其不免乎已而楊左六公并命大武護大章喪歸益自放於

酒未幾歿 又黃宗羲顧玉書墓誌曰玉書名麟生大章子

志氣豪邁好讀書年十五大章遭奄禍及烈廟昭雪死事而

大章以封疆一案為逆黨把持止於贈官麟孫赴闕頌冤帝

詔法司改定爰書周延儒之再相也錢謙益致書勸其起用

馮銓麟孫知其事而洩之於人謙益大恨欲寘之死因徙居

吳門詩文有

進履齋草

陳必謙字益吾曾祖交字汝同有至行由舉人官興寧知縣著

廉聲必謙登萬歷癸丑進士知輝縣濬阜水萬泉等河民利

賴之擢南御史抗疏論挺擊紅丸二案罪人當窮治削籍歸

崇禎初起故官極論奄黨諸姦罪又陳京察當行六事曰正

紀綱明職業重操守破情面禁借端息黨議累擢都御史巡

撫河南時汴宋汝雒間所在皆寇必謙所部兵不滿千人援

勦邊兵多駐洛西必謙亟檄令主客兵分道殺賊邊將左良

玉部將李雲程趙柱累戰皆捷部將陳永福自陳趨沈邱攻

破賊賊分走潁鞏洛必謙曰濠潁接壤園陵不可再驚而西

賊又不容緩圖乃自引兵而西命陳永福率兵赴潁力戰賊

走黃州西賊亦奔洛西永寧靈寶告急必謙遣別將救永寧

而自救靈寶賊依朱陽山而陣師薄之賊潰走尸填川谷別

將亦敗賊於河底村已而賊帥號闖王者擁眾出關合數部

寇雒陽必謙督邊將左良玉祖寬等戰於九臯山又大戰汝

州圯料鎮斬賊帥闖塌天整齊王賊潰走或西入秦或南入楚而闖賊由汝寧入南直界必謙上疏請專勦闖賊餘黨當自定方議進兵會賊別部復自秦楚分道向雒闖賊乃復進窺歸德開封必謙督諸將迎擊敗之度闖必西分兵備汝雒賊果西諸將前後夾擊又破之會楚郎二撫不能同心而京師戒嚴邊帥在河南者皆召入衛賊勢復猖必謙轉戰宛雒界上斬賊掃地王擒僞軍師金龍騰甚著勞績執政忌其功遂以誤撫墮計土寇不戢二事爲罪解任歸必謙歸而河南不可爲矣初帝嘗書天下清官四人於御屏首文震孟次卽必謙次劉宗周次黃道周久之召爲工部侍郎晉尙書未幾

有甲申三月之難必謙被執得間亡歸發憤病死

錢志

魏浣初字仲雪萬歷丙辰進士改嘉興府教授集諸生講論如家塾之課子弟遷南京戶部主事晉吏部郎中陞廣東僉事分巡嶺南擒巨盜李魁奇鍾國讓等尋陞參政提學廣東公慎明允文有未善每名諸生面爲指授卒於官爲人清隘自好喜爲詩得元白意弟冲字叔子崇禎庚午舉人與兄齊名一時名士多從之遊詩亦倣元白體

錢志

孫朝肅字恭甫七政孫萬歷丙辰進士授刑部主事光宗不豫李可灼進紅丸朝肅上書大學士方從哲責其不清宮闈隱蠹調養聖躬有負先帝之託其後諸臣抗疏排擊實自朝肅

發之出知兗州府會白蓮賊亂單騎赴任繼入城鼓勵士民
悉力戰守賊平陞廣東副使遷布政使失巡撫意鐫級歸弟
朝讓字光甫崇禎辛未進士由刑部員外出為泉州知府內
艱服闋復補泉州泉人歡呼如父母再至陞建南道副使尋
進按察使陞江西布政使未赴而明亡時年未五十優游林

泉四十餘年詩文多發天然草書法孫過庭年九十而終

錢志

參昭
文志

瞿式耜字起田禮部侍郎景淳孫湖廣參議汝說子也舉萬曆
四十四年進士授吉安永豐知縣有惠政調江陵永豐民乞
留命再任以憂歸崇禎元年擢戶科給事中疏言李國楷宜

留內閣王永光宜典銓曹于沐宜秉憲鄭三俊畢懋良宜總
版曹李邦華宜主戎政帝多採其言俄陳朝政不平為王之
案請恤孫慎行訟寃速楊鎬王化貞之誅白楊漣左光斗結
毒之謗追論故相魏廣微顧秉謙馮銓黃立極之罪因言奪
情建祠之朱童蒙不可寬積愆久廢之湯賓尹不可用帝亦
納之又極論來宗道楊景辰附逆不可居政府二人旋罷去
御史袁弘勛劾大學士劉鴻訓逆黨徐大化實主之川貴總
督張鶴鳴先已被廢其復用由魏忠賢式耜並疏論已頌楊
漣魏大中周順昌為清中之清忠中之忠三人遂賜諡未幾
陳時務七事言起廢不可不覈陞遷不可不漸會推不可不

慎諡典宜嚴刑章宜飭論人宜審附璫者宜區分又極論館選奔競之弊請臨軒親試事多議行時將定逆案請盡發紅本定其情罪輕重又言宣府巡撫徐良彥不附逆奄爲崔呈秀誣劾遣戍亟當登用彥良遂獲起式耜矯矯立名所建白多當帝意然搏擊權豪大臣多畏其口十月詔會推閣臣禮部侍郎錢謙益以同官周延儒方言事蒙眷慮並推則已絀謀沮之式耜謙益門人也言於當事者擯延儒弗推而列謙益第二溫體仁遂發難延儒助之謙益奪官閑住式耜坐貶謫式耜嘗頌貴寧參政胡平表殺賊功請優擢其後平表爲貴州布政使坐不謹罷式耜再貶二秩遂廢於家久之常熟

姦民張漢儒希體仁旨許謙益式耜貪肆不法體仁主之下法司逮治巡撫張國維巡按路振飛交章白其寃不聽比兩人就獄則體仁已去位獄稍解謙益坐削籍式耜贖徒言官疏薦不納十七年福王立於南京八月起式耜應天府丞已擢右僉都御史巡撫廣西明年夏甫抵梧州聞南京破靖江王亨嘉謀僭號召式耜拒不往亨嘉至梧州劫式耜幽之桂林遣人取其敕印初式耜議立桂端王子安仁王及唐王監國式耜以爲倫序不當立不奉表勸進至是爲亨嘉所幽乃遣使賀王因乞援王喜而亨嘉爲丁魁楚所攻勢窘乃釋式耜式耜與中軍官焦璉名思恩參將陳邦傳共執亨嘉亂遂定

唐王擢式耜兵部右侍郎協理戎政式耜不入朝退居廣東
順治三年九月 大兵破汀州式耜與魁楚等議立永明王
由榔乃迎王梧州以十月十日監國肇慶進式耜吏部右侍
郎東閣大學士兼掌兵部事未幾贛州敗報至司禮王坤迫
王赴梧州式耜力爭不得十一月朔蘇觀生立唐王聿錞於
廣州式耜乃與魁楚等定議迎王還肇慶遣總督林佳鼎禦
觀生兵敗歿式耜視師峽口十二月望 大兵破廣州王坤
趣王西走式耜趨赴王王已越梧而西四年正月 大兵破
肇慶逼梧州丁魁楚呂大器王化澄皆棄王去止式耜及吳
炳吳貞毓等從乃由平樂抵桂林二月 大兵襲平樂分兵

趨桂林王將走全州式耜極陳桂林形勢請留不許自請留
守許之進文淵閣大學士兼兵部尚書賜劍便宜從事平樂
潯州相繼破桂林危甚總督朱盛濃巡按辜延泰布政使朱
盛澗副使楊垂雲桂林知府王惠卿以下皆遁惟式耜與通
判鄭國藩縣丞李世榮及都司林應昌李當瑞沈煌在焉
大兵於三月薄桂林以騎數十突入文昌門登城樓瞰式耜
公署式耜急令援將焦璉拒戰凡三月式耜身立矢石與士
卒同甘苦積雨城壞吏士無人色式耜督城守自如故人無
叛志援兵索餉而譁式耜括庫不足妻郤捐簪珥佐之既而
璉兵主客不和譟而去城幾破者數矣會陳邦彥等攻廣州

大兵引而東桂林獲全璉亦復陽朔及平樂陳邦傳亦由
潯復梧州王聞捷封式耜臨桂伯璉新興伯式耜初請王返
全州不聽已請還桂林王已許之會武岡破王由靖州走柳
州式耜復請還桂林十一月大兵自湖南逼全州式耜偕
何騰蛟拒却已梧州復破王方在象州欲走南寧以大臣力
爭乃以十二月還桂林五年二月南安侯郝永忠駐桂林惡
城外團練兵盡破水東十二村殺戮無算與式耜構難式耜
力調劑永忠乃駐興安大兵前驅至靈川永忠戰敗入桂
林請王卽夕西走式耜力爭不聽左右皆請速駕式耜又爭
王曰卿不過欲予死社稷耳式耜爲泣下沾衣王甫行永忠

卽大掠捶殺太常卿黃太元式耜家亦被掠家人矯騰蛟令
箭乃出城日中趙印選諸營自靈川至亦大掠城內外如洗
永忠走柳州印選等走永寧明日式耜息城中餘燼安撫遠
近焦璉及諸鎮周金湯兆佐胡一青等各率所部至騰蛟軍
亦至三月大兵知桂林有變來襲抵北門騰蛟督諸將拒
戰城獲全時王駐南寧式耜遣使慰三宮起居王始知式耜
無恙爲泣下閏三月廣東李成棟江西金聲桓皆叛

大清據地歸式耜請王還桂林王從成棟請將赴廣州式耜慮
成棟挾王自專力爭之乃駐肇慶十一月永州寶慶衡州並
復式耜以機會可乘請王還桂林圖出楚之計不納式耜身

在外政有關必疏諫嘗曰臣與主上患難相隨休戚與共不同他臣一切大政自得與聞王爲褒納而是時成棟子元允專朝政知敬式耜袁彭年丁時魁金堡等遂爭相倚附六年正月時魁等逐朱天麟不欲何吾騶爲首輔名式耜入直以文淵印畀之式耜終不入也未幾騰蛟聲桓成棟相繼敗歿國勢大危朝士方植黨相角式耜不能禁七年正月南雄破王懼走梧州諸大臣訐時魁等下獄式耜七疏論救胡執恭之擅封孫可望也式耜疏請斬之皆不納九月全州破開國公趙印選居桂林衛國公胡一清守榕江與寧遠伯王永祚皆懼不出兵大兵遂入巖關十月一清永祚入桂林分餉

榕江無戍兵大兵益深入十一月五日式耜檄印選出不肯行再趣之則盡室逃一青及武陵侯楊國棟綏寧伯蒲縵寧武伯馬養麟亦逃去永祚迎降城中無一兵式耜端坐府中家人亦散部將戚良勛請式耜上馬速走式耜堅不聽叱退之俄總督張同敞至誓偕死乃相對飲酒一老兵侍名中軍徐高付以敕印屬馳送王是夕兩人秉燭危坐黎明數騎至式耜曰吾兩人待死久矣遂與偕行至則踞坐於地諭之降不聽幽於民舍兩人日賦詩倡和得百餘首至閏十一月十有七日將就刑天大雷電空中震擊者三遠近稱異遂與

同敞俱死

明史忠烈紀實王贈式耜粵國公諡文忠

龔立本字淵孟讀書好古才高氣雄萬歷乙卯舉於鄉選太平府教授遷福安知縣調繁崇德政最遷南京刑部主事是時江東烽火相望兵部日牒姦細百餘人下刑部立本提牢奮筆縱捨若干人尙書范景文大怒立本跪告實民非賊乃解卒坐鞫獄輕降調歸先是孫承宗視師遼東將以監紀舉立本立本以親在辭所著全遼圖說遼事類鈔邊將知兵者無以過古文詞初爲六朝晚效秦漢有浪泊集松窓快筆又修縣志若干卷

錢志

許士柔字仲嘉常熟人天啓二年進士改庶吉士授檢討崇禎初歷遷左庶子掌左春坊事先是魏忠賢旣輯三朝要典以

光宗實錄所載與要典左乃言葉向高等所修非實宜重修遂恣意改削牴牾要典者崇禎改元燬要典而所改光宗實錄如故六年少詹事文震孟言皇考實錄爲魏黨曲筆當改正從原錄時溫體仁當國與王應熊等陰沮之事遂寢士柔憤然曰若是則要典猶弗焚矣乃上疏曰皇考實錄總記於世系獨略皇上娠教之年聖誕之日命名之典潛邸之號聖母出何氏族受何封號此皆原錄備載而改錄故削之使聖朝父子母后兄弟之大倫皆闇而不明缺而莫考其於信史謂何疏上不省體仁令中書官檢穆宗總記示士柔士柔具揭爭之曰皇考實錄與列聖條例不同列聖在位久登極後

事編年排纂則總記可以不書皇考在位僅一月三后誕育聖躬皆在未登極以前不書之總記將於何書也穆廟大婚之禮皇子之生在嘉靖中故總記不載至於冊立大典編年未嘗不具載也皇考一月易世熹廟之冊立當書皇考之冊封獨不當書乎體仁怒將劾之爲同列沮止士柔復上疏曰累朝實錄無不書世系之例臣所以抉摘改錄正謂與累朝成例不合也孝端皇后皇考之嫡母也原錄具書保護之功而改錄削之何也當日國本幾危坤寧調護真孝慈之極則顧復之深恩史官不難以寸管抹殺之此尤不可解也疏上報聞體仁滋不悅會體仁喉劉孔昭劾祭酒倪元璐因言士

柔族子重熙私撰五朝注略將以連士柔士柔亟以注略進乃得解尋出爲南京國子祭酒體仁去張至發當國益謀逐士柔先是高攀龍贈官士柔草詔詞送內閣未給攀龍家故事贈官誥屬誥敕中書職掌崇禎初褒卹諸忠臣翰林能文者或爲之而中書以爲侵官崇禎三年禁誥文駢儷語至是攀龍家請給去士柔草制時數年矣主者仍以士柔前撰文進中書黃應恩告至發誥語違禁至發喜劾士柔降二級調用司業周鳳翔抗疏辨不報士柔尋補尙寶卿丞遷少卿卒子琪詣闕辨誣乃復原官贈詹事兼侍讀學士

明史

錢希言字簡栖博覽好學刻意爲聲詩王百穀見其詩曰後來

第一流也薄游浙東荆南豫章屠長卿湯若士諸公皆稱之
然恃才負氣人爭避之卒以窮死所著書曰松樞十九山又

撰劍筴遼志書多散佚

列朝詩集

馮復京字嗣宗御史玘之元孫強學廣記少業詩鈎貫箋疏著
六家詩名物疏六十卷謂冠婚喪祭不當抗家禮於會典作
遵制家禮四卷羅舊聞述先德作常熟先賢事略十卷族譜
四卷年四十餘始見實錄謂通記詳而野吾學裁而疎弁山
炫博妄而謬憲章典則自鄒無譏作編年書駁正得失曰明
右史略草創未就卒長子舒字已蒼幼承家學肆力經史百
家尤邃於詩萬歷間詩道廢壞舒搜討遺佚編削譌謬疏通

證明為馮氏一家之學平生直腸快口遇事敢為小人嫉之

如讐順治初構釁於邑令瞿四達指所著懷舊集為謗訕曲

殺之

錢志

瞿純仁字元初參政莊八世孫築室拂水巖下與一時名士瞿

汝說顧雲鴻錢謙益邵濂輩讀書其中拂水文社遂甲吳下

純仁狀貌豐偉如河朔傖父而所為文鮮妍妙麗如時花美

女終不得志以死

錢謙益誌

何允泓字季穆淮府長史鈞季子少習詩歌古文長而學問日
成自唐宋以來經世大典如杜鄭馬邱四氏之書攬撫解剝
窮極指要好談三吳水利訪問三江古道及夏周疏濬遺蹟

窮鄉汨泐扁舟往返嘗遇盜奪襪被忍凍以歸卒年四十有

一列朝詩集

陳三恪字象賢年十八代其父士介教授早夜力學旁通堪輿

卜筮壬遁風角家言網羅舊聞摺摭成書名曰海虞別乘錢

謙益為撰玉淵生傳錢志

王夢鼎字兆隆崇禎辛未進士知烏程縣改襄城建永安堡武

定寨於張村以遏寇盜巨盜混十萬黨至夢鼎單騎擒其魁

晉刑部主事工部郎中出知保定府蠲雜徭清馬政剪除豪

民劇盜閩人貴戚不任公家賦者皆就役時添兵一萬專責

府餉又議買南征戰馬千餘匹皆抗疏力爭歲得省餉三十

萬而市馬事亦不果行卒於官兄夢鼎字兆吉天啓丁卯舉

人官吏部司務為人孝友與夢鼎并衣共炊居鄉急病讓夷

不遺餘力留意邑中文獻搜羅放失後錢陸燦修邑志證據

多其手訂錢志

嚴斌字子張大學士訥之孫中書舍人澤之子少穎悟工書畫

篆刻兼善騎射崇禎甲戌登進士知信陽州地當寇衝繕守

禦練鄉勇賊興世王者銳悍無敵斌與巡撫陳必謙部將陳

永福李國禎等擊之斬俘而歸時盧象昇督師河上獨與斌

商榷軍務如左右手轉戰趙莊邢集平關等處皆以少勝衆

總兵祖寬不戢下斌以牛酒犒師不令入城民得安堵丁艱

服闋薦起爲兵部主事未任順治初大吏交薦自以衰癯固

辭卒

錢志

蔣棻字畹仙崇禎丁丑進士除南海知縣催科有法猾吏不得

乾沒慮囚痛懲誣供及爲飲章者擒治妖人熊順吾不致蔓

延煽變丁艱服闋補建安縣時多盜警棻濬城隍行保甲募

鄉勇得勝兵數百屹若雄鎮巡撫張肯堂舉廉幹第一陞禮

部主事未赴遭國變杜門著述年六十卒

陳志參
錢志

張履端字雲翎天啓甲子舉人知鄱陽縣初朝淮王卽白宗人

害民狀親藩爲歛威流寇猖獗履端糾集鄉勇斬數百人復

以計縛賊首何應鰲等調守兵趨鱖魚寨賊盡解散時楚藩

失利援兵紆道至饒履端犒之而嚴爲之備民得安堵入

國朝隱桃源澗作北門行以見志

曾志

項志寧字靖伯少孤好學能文屢試棘闈不售福王時始以選

貢入南都一日謁同里巨卿甫就坐閤人報大僚某某至志

寧退入屏後聞其言惟媚事權要爲營私植黨計亟歸泣語

弟志康曰事不可爲矣及薙髮令下遺書知交約同殉題詩

於壁遂不食死門人私謚曰文烈時里中先後殉義者屈坦

之字毓菴文行修潔爲鄉祭酒甲申之變不食七日死鄉飲

賓祝舜齡聞變觸堦死子汝祥哭殮畢與妻葉氏子萬壽投

井死王道煥邑令王鈇後裔城破遇兵死

陳如鑾撰傳
參曾倬志

徐懌字瞻洪家貧少時寄食外家苦心力學爲諸生卓然自立
甲申聞變慟哭不食欲死家人每謹伺之乙酉

王師至下薙髮令懌湛然如常呼婦共奕婦方屑麥爲飯不應
強之終一局歎息而起題詩留几上闔戶自經

徐守質字野王有聲庠序兵至母病不能去謂兄基曰不可俱
死斷徐氏世兄長宜行守質當侍母基曰弟賢不可徒死我
無益於時當侍母死生以之相讓且久兵勢益急基乃棄妻
子逃守質被二創死母與妹俱沈井中

馮知十字彥淵復京季子縣學生爲人有謀而勇於義知明將
亡乃招致四方奇士知星歷善弓馬者座上恒滿福王時挾

策入南都有內臣識而奇之將草疏舉爲總兵知十恥由奄
寺進固謝止之鄉兵起衆且數萬知十嘆曰此輩但拍手將
駭而走何能爲耶諒爲義士不當苟免我居此以俟死耳七
月十三日 大兵至邑知十在友人何氏舍猝遇之奮臂格

鬪飛矢中胸仆地被斫死

以上並馮班海虞三
義傳參忠烈紀實

許重熙字子洽上蔡知縣河孫爲太學生以史學著當世崇禎
九年刻五陵注略觸誠意伯劉孔昭忌將發難祭酒倪元璐
爭之因并攻元璐牽連參閱姓氏七十五人俱東林指名時
溫體仁當國陰主之擬旨推究三上不允而解後周延儒復
相令所親敦請不往所著有歷代通略大臣年表行世宋史

增定新編綴籬草旅寄軒彙未刻錢志

錢謙貞字履之副使順德孫少孤嗜學受知於邑令楊漣以多

病遂絕意場屋讀書求志闢懷古堂以奉母所與游惟魏冲

馮舒輩閉門却掃有古隱士風初為詩好劉長卿韋莊羅隱

許渾之作後更深於韓杜元白旁獵蘇陸能度曲審音尤善

書法所著有未學菴彙年五十四卒子孫保字求赤為人方

巖抗特勤讀書有父風列朝詩集馮班撰傳錢志合纂

錢安修字方明為諸生七試皆第一游於張溥之門稱高弟子

所作詩古文辭堅古峭拔年二十九卒舊府志

毛晉元名鳳苞字子晉父清以孝弟力田起家楊漣為令時擇

縣中有幹識者十人每有大役倚以集事清其首也晉奮起

為儒游錢謙益之門好古博覽搆汲古閣藏書數萬卷刻十

三經十七史古今百家書手自讐校行於世為人孝友恭謹

與人交有終始又好施與推官雷某贈之詩曰行野漁樵皆

謝賑入門僮僕盡鈔書所著有和古今人詩野外詩題跋虞

鄉雜記隱湖小志海虞古今文苑毛詩名物考宋詞明詩記

事明詞苑英華僧弘秀集隱秀集國秀集閩秀集共數百卷

錢謙益誌其墓季子辰字斧季精於小學最知名舊府志參縣志

趙牧常熟人與福建人林籥舞皆為平海將軍周崔芝客籥舞

為參謀牧為總兵鄭芝龍之降也籥舞陳八不可弗聽監軍

朱永佑謂崔芝曰虞山趙牧其人勇士也我欲使見芝龍而刺之不果丁亥正月崔芝復海口箭舞與牧守之四月大兵攻海口牧出戰所殺傷過當又益兵攻之城破兩人皆死


忠烈紀實

王奕昌字德符參議嘉言曾孫以貢除江西布政司理問遷廣西都司斷事署武宣陽朔二縣所至治辦靖江王亨嘉久蓄異志奕昌刺得其狀密告巡撫瞿式耜早為之備乙酉七月唐王建號亨嘉拒命襲破梧州禽式耜以歸囚之邸中奕昌遣間使饋鮭菜得式耜密書星夜趣東將吏進兵亨嘉就縛亂遂定丁亥永明王從桂林走楚式耜留守桂林奕昌以府

同知守柳 大兵逼桂林分兵從潯州略左右郡縣趨柳叛將李明忠據潯以瞰柳分守副使知府推官皆遁奕昌獨與馬平令城守明忠劫降書至奕昌縛其使械送桂林誓死待援會武宣狼目廖文登等襲沈北舟思恩侯陳邦傳復潯州明忠遁柳乃固是年夏式耜奏擢奕昌為按察僉事監陽朔軍與新興侯焦璉恢復平樂戊子二月陞廣西右參議督理糧儲明年六月一日輓運至龍門為滇營亂卒所害贈太僕卿

約錢謙益所撰墓誌

鄧大臨字起西號丹邱舉人敏曾孫幼孤稍長力學師事江陰黃毓祺乙酉秋江陰城守不下毓祺起兵竹塘應之大臨亦



募兵崇明事敗毓祺亡命淮南以官印印所往來書爲人告變捕入金陵獄大臨職納橐餽獄急毓祺以所著小游仙詩園中草授大臨坐脫而去當事戮其屍大臨號泣守喪鋒刃之中贖其首聯之於頸棺殮送歸當時稱毓祺之門有徐趨與大臨趨則抗節而死者也大臨師死之後遍走江湖後爲

黃冠以卒

黃宗義撰墓誌

本朝

○錢謙益字受之萬歷三十八年進士第三授編修尋丁父憂天啓元年補原官主浙江鄉試遷右中允初謙益登第時黨論方起與同年生韓敬不相能至是敬以行人考察罷家居

令人詭稱謙益門客徧授關節於士之有文者榜發有錢千秋者得所授俚俗詩七字分置七義結尾爲給事中顧其仁所摘謙益亦自檢舉法司戍千秋謙益坐奪俸因移病歸四年起爲左諭德進少詹事魏忠賢羅織東林諸人謙益以黨魁削籍歸崇禎元年召爲詹事轉禮部右侍郎十一月大學士劉鴻訓罷詔會推時禮部尙書溫體仁以望輕不與侍郎周延儒方以名對稱旨謙益慮其先已也力尼之二人皆銜刺骨體仁遂借浙闈舊事訐謙益不當與閣臣選帝見會推無延儒名已不能無疑及體仁疏入次日召對閣部科道諸臣於文華殿命體仁謙益皆入謙益不虞體仁之劾已也及

蘇州府志 卷之十三
三
廷辨體仁氣蠶厲言如湧泉而謙益辭頗屈時助體仁者止
一延儒廷臣皆言謙益無罪吏科都給事中章允儒爭尤力
帝怒下允儒獄并切責諸大臣卽日罷謙益官命議罪允儒
及給事中瞿式耜御史房可壯皆坐黨謙益降謫千秋獄上
謙益坐杖論贖竟廢不用而延儒體仁遂相繼入閣矣家居
九年體仁讐之不釋奸民張漢儒者揣知其指遂訐謙益及
瞿式耜家居不法事體仁擬旨逮二人下刑部獄嚴訊謙益
危甚求解於司禮監曹化淳漢儒偵知之告體仁體仁密奏
帝請并坐化淳罪帝以示化淳化淳懼自請案治乃盡得漢
儒等奸狀及體仁謀獄上帝始悟體仁有黨於是漢儒及其

黨陳履謙王璠俱立柳死體仁遂去位謙益式耜得放還十
七年四月京師陷報至謙益赴南京與諸大臣議立君謙益
欲立潞王議未定而鳳督馬士英及劉澤清諸將擁福王至
福王立士英與阮大鍼用事謙益懼不見容遂附二人得爲
禮部尙書又上疏頌士英且爲大鍼訟寃修好然二人終疑
之狂僧大悲獄起大鍼欲假以盡誅清流造爲十八羅漢五
十三參之目謙益亦列焉士英不欲興大獄戮大悲而止順
治二年五月

王師定江南謙益入朝以禮部右侍郎管秘書院學士事尋以
老病乞歸四年復以江陰黃毓祺事牽連下獄事白得釋康

熙三年年八十三卒謙益顛頓仕途立朝不滿五載當時忌者謂其標榜黨人把持朝局然以文章擅天下又與楊李文黃諸正人友善雖見廢而名不衰惜乎縈情利祿溺志聲色不克保其晚節其於書經史百家下及稗官釋典無所不讀盡能驅使詩宗少陵出入韓白義山蘇陸元虞諸家文法韓歐下逮金華震川旁及六朝初唐才力富健兼綜衆長嘗論有宋淳熙以後以腐爛爲理學其失也陋有明弘正以後以剽賊爲古學其失也俗於李何王李之模擬鍾譚之詭僻排擊不休至李東陽之詩歸有光之文則力推奉焉海內以其言爲質的厥後攻之者雖多然才思之雄亦無有能及之者

家有絳雲樓藏書甚富晚歲里居以明史自任屬稟未就一夕悉燼於火乃歸心佛乘以自遣云所著初學集一百卷有學集五十卷列朝詩集一百卷開國羣雄事略三十卷楞嚴金剛心經蒙鈔共十四卷並行於世

按牧齋文學應列

國史文苑傳之首其閣訟始末又明季朝局所關舊府縣志皆疎舛無法今詳考明史溫周馬阮諸人傳馮舒海虞妖亂志及初學有學集直書其事以備史家採擇凡他傳之詳而與舊志異者倣此

○楊彝字子常唐墅人明萬歷末士之爲時文者喜倡新說畔違傳註彝與太倉顧夢麟思振其弊相與講論辨難力明先儒之說天下翕然從風稱楊顧學弟子著錄者數百人吳中

名士興復社葬為眉目屢試不遇以歲貢為松江訓導薦授
 都昌知縣移疾不往明亡後杜門不出葬性孝友母歿嘔血
 數升斷酒食終喪撫孤姪有恩少所師事死獨力殯埋之且
 為婚嫁其子終身力學晚歲目盲猶時令人讀書其側為諸
 生講說無少倦年七十九卒

汪琬楊顧兩先生傳 啓禎遺詩傳云彝子靜字定夫自少能

詩文為諸生年二十
 二病卒彝每哭之慟

○孫永祚字子長號雪屋幼即貫穿經史為諸生有名門弟子
 日進所著古文詩賦甚富工書法一時物望如董其昌鍾惺
 諸前輩皆稱小友世稱虞山有兩子長常長同音謂楊彝永
 祚也崇禎乙亥以選貢授推官弗赴隱居教授從學者傾郡

縣每語弟子曰文章事業不從五倫中出者總為無本之學
 父母歿數年常思哭如孺子身長八尺鬚眉如畫雖居處幽
 室氣體肅然品行端潔人望之如陳寔王烈也年八十餘卒
 所著有夜氣箴雪屋詩文集

錢志

○馮班字定遠復京仲子少為諸生與兄舒齊名連蹇不遇遂
 棄去發憤讀書工詩游錢謙益之門謙益序其詩沈酣六代
 出入義山牧之庭筠之間其論詩謂王李死擬盛唐戒不讀
 唐以後書詩道於是大壞牧齋極力洗發天下猶墮雲霧中
 於是窮流溯源自三百篇以下一一考其根柢明其變化所
 自其論文謂韓吏部之文古文也歐陽公之文只是今文不


如唐人四六尚有古意古語書法四體皆能尤工小楷有晉唐人風致其為人落拓自喜奴視法度士意所不可掉臂去胸有所得曼聲長吟經行市中履陷於淖衣裂其幅望望去之如無見一人者當其被酒無聊抑鬱憤懣輒就座中慟哭人亦不知其何以謙益詩所謂願借馮班慟一場者也班行第二時稱爲二癡云所著有馮氏小集鈍吟詩文橐雜錄行世子行賢字補之弱冠能詩嘗舉博學鴻詞工書法尤精篆刻匹文三橋弟行貞字服之倜儻不羈善擊劍攢槊投石挽強嘗從康親王南征有功棄之歸仍事筆硯間工畫松石又班弟知十子武字寶伯亦能詩善書著書法正傳二卷遙擲

橐十卷班元舒之孫修字念修從陳瑚游安貧自守攻爲詩

著東村仙源諸集錢曾二志合纂

○何雲字士龍祖錞字言山讀書朱黃不去手書法視允明雲能古文詞尤熟唐史凡唐人詩有關時事者歷歷指出如目覩錢謙益延致家塾崇禎丁丑謙益被訐下獄雲慷慨誓死草索相從世以郭亮王咸擬之後從瞿式耜至閩粵流離十五年復歸故園謙益謂其才情意匠蒼老雄健尤稱其七夕行感激用壯有玉川月蝕之遺錢志

○錢朝鼎字禹久順治丁亥進士授刑部主事歷員外郎中遷廣東提學道爲天下學政第一陞浙江按察使發奸摘伏無



偏徇桐廬有僕弑主移獄於主妾與一童子爲姦殺已誣服
矣朝鼎視妾一弱女童子尤孱羸而僕爲之證者目動而言
詐乃厲聲詰曰弑主者汝也僕驚具服遂出二人罪湖有盜
黨竄入司署爲吏每鞠是獄立案傍刺探獄情陰爲營救朝
鼎疑而訊之遂并伏辜超擢副都御史忌者借欽案未結劾
之會丁內艱歸服闋補鴻臚卿遷大理少卿山西有烈婦不
受鄰人挑自縊死婦已旌鄰人僅擬遣戍朝鼎爭之曰戍者
尙可生還異日掉臂出入烈婦坊下天理與國法俱隳矣法
司乃從其議卒以前忌者鐫級罷歸

曾陳二
志合纂

○孫魯字孝若廣東布政朝肅子順治壬辰進士授衢州府推

官西安民祝廿五爲從子所殺埋尸滅跡獄久未決魯廉察
得實案治從子與其黨如法其餘多所平反遠近翕然稱神
明陞高州府同知缺裁補紹興府俸滿遷大同知府大同近
邊而俗朴民未知禮魯到官首行鄉飲酒禮舉故總兵麻振
揚爲大賓禮儀秩然民間驚告爲盛事設義學拔諸生文行
優者以爲師比屋有弦誦聲 大兵討吳三桂調發旁午魯
辦理芻糧有法民以不擾以母老乞終養尙書魏象樞聞之
歎曰家有孝子國少一廉吏矣歸里後貧甚杜門侍母色養
備至會母病卒魯哀慕逾年亦卒

錢志

○孫承恩初名曙字扶桑爲諸生負才標望以選牘文體不正

被論除名又以太學生領順天鄉薦順治戊戌殿試第一授
修撰數被顧問寵遇日隆從幸南海子

賜騎御閑名馬適大風揚沙中寒疾卒年僅四十承恩為人孝
友文工六朝詩學溫李書法歐陽邑人以狀元登第者自承
恩始弟賜字赤崖少遊文社名與兄埒順治丁酉舉順天鄉
試科場事發為人牽連謫戍尚陽堡

聖祖東巡獻頌萬餘言 召至幄前賦東巡詩試以書法

上歎惜其才大學士宋德宜疏薦不果用久之還里所著有蔗

菴集

錢志參沈皞
曰孫蔗菴傳

○陸貽典字敕先博學工詩其論詩謂法與情不可缺一言法

者如唐詩品彙吟卷文鑑之選非詩法也言情者曰詩主於
趣不必問學趣主於新不必合理此詩歸所謂情非詩情也
原本風騷別裁偽體著元要齋漸于詩集工書法漢隸尤勝

曾陳二
志合纂

○錢曾字遵王少學於族祖謙益謙益謂能紹其緒撰吾炙集
標曾詩為首絳雲樓燼餘書籍及詩文彙悉付藏弄其注初
學有學集詩探索羣書發皇幽渺海內詩人多稱之述古堂
藏書多善本撰讀書敏求記識其源委所著詩有交蘆判春

諸集

曾陳二
志合纂

○錢陸燦字湘靈高才嗜古為經義清真老硬順治丁酉鄉舉

蘇州府志 卷之十三
第二科場弊發覆試者再名皆前列未幾以糧案註誤教授
毘陵金陵間詩歌骨力雄厚一掃浮靡古文不名一家磊落
自喜晚年偕徐乾學王日藻秦松齡周金然尤侗黃與堅等
爲耆年會陸燦無位而齒最宿名最高諸公皆兄事之有調
運齋集若干卷 陳志

○沈卓字秋士邑諸生家貧居市廛超然物外有竟體芳蘭之
致詩格近孟東野李長吉有中峯東村諸集同里鄧林梓字
肯堂藪之裔高才淹雅以布衣薦博學宏詞卒於都陳帆字
秋浦詩字畫稱三絕人亦狷潔 陳志

○陳協字鄴仙工詩詞阨窮潦倒家城西山麓日與馮班輩上
下巖谷清詞麗句下筆不能自休有鶴山曠谷諸集同時陳
玉齊字在之周臺字雲書皆以詩名又陳如鑿字子兼龔庠
字鄴僧皆攻詩窮餓而死 陳志

○瞿有仲字有仲純仁孫少游陳瑚之門與人交常訥訥不出
口對知己則辯論泉湧驚其座人其詩亦多鬱勃感激之概
著焚餘集同里陳祺芳字子壽爲諸生游錢謙益龔鼎孳之
門客游遍天下詩文豪宕有逸氣著韜菴鷗波諸集 陳志

○瞿昌文字壽名明桂林留守式耜孫性豁達能行度外事年
十七念其祖在遠欲往省恐父母惜其年少不聽一日早起
襆被獨行家人覺之急遣力齎資用追及於杭州僧舍間關

萬里微服隱名冒矢石陷重圍幾死者再然後得達式耜誦退之知汝遠來之句且喜且悲後竟裹骨而歸將歸又幾落虎口式耜以歿後英爽脫之事詳其家傳初昌文既往家書久不至其叔父元鎬繼往道阻不得達歿於永安

陳志

○許德璠字荆生邑諸生父國賢居袁墅力行善明末江陰無錫避兵來其鄉者國賢計口與之居食時簽大戶解白糧多破產國賢為公正請於巡撫土國寶得奏改官運德璠繼父之志勇於為善康熙初叩閭請減蘇松賦額每遭旱潦傾困施舍貧不舉子者出貲收養邑之有育嬰堂自德璠始

陳志

○蔣伊字渭公號莘田棻之子康熙癸丑進士選庶吉士授監

察御史巡視中城疏陳六部積習請減白糧之價嚴誣逆之條又請勤撫恤務開墾賑荒濟飢皆切中機務彈劾大吏不避權要時三逆未平征調四出伊以蘇州內地不必防禦所駐滿兵二千徒以擾民力請撤回又集民間疾苦繪十二圖以進

聖祖覽之動容京師地震應

詔密陳三疏捐納例廣正途壅滯疏請澄汰疏通直聲震海內忌者扼之出為廣東糧儲參議當兵燹後供億繁苦吏緣為奸伊禁陋規革耗羨蠲滌煩苛粵人便之遷河南副使提督學政釐正文體杜絕請託所獎拔皆寒雋卒於官年五十七

伊爲諸生時卽負經世志甫釋褐上所著玉衡臣鑒二錄生平見義勇爲篤於倫誼居家孝友待親族故舊有恩惜未究其用云有文集十八卷長子陳錫字文孫康熙乙丑進士除富平知縣關中大饑力請上官發粟賑濟他邑或委胥吏尅減乾沒實惠及民者十不得六七惟富平按戶散給官帑不繼佐以家財故飢而不害治最擢禮部主事累官至山東巡撫雲貴總督熊賜履撰墓誌參昭文新志

○翁叔元字寶林憲祥孫康熙丙辰進士第三授編修文望甚著與韓菼齊名戊午主山東鄉試所拔畢世持等皆知名士歷右贊善侍講侍讀陞國子監祭酒三遷吏部侍郎充

經筵講官晉工部尙書部有大工四十三案十年未銷算叔元

請六部舉司官各二人分董其役半載而清乞假歸壬申起補刑部尙書所平反全活甚衆丁丑致仕所著有鐵菴文彙

梵園詩集

韓菼撰碑參縣志

○歸允肅字孝儀父起先明崇禎末進士官刑部主事著易聞詩通解允肅少疑重謹厚康熙己未進士第一授修撰辛酉主順天鄉試所拔皆真才一空從前諸弊刑部尙書魏象樞昌言於朝慶其得人日講官缺掌院屢列名上請未俞允

聖祖忽於袖中出片紙則允肅名也進講周易毛詩進止端詳敷奏明暢睢州湯斌歎曰講筵得正人天下有賴矣陞中允

歷侍講侍讀進講讀學士少詹事與議政事持正不阿以疾

告歸卒於家

舊府志縣志合纂

○蘇翔鳳字苞九父祖蔭順治壬辰進士除戶部主事督理清

江糧餉以廉幹稱忤勢要鐫秩後署泰安州事卒於任翔鳳

積學嗜古收名早而遇合遲性伉直雅不喜俗士康熙壬戌

登進士知沂水縣半月遽卒

曾陳二志合纂

○黃儀字子鴻熟精輿地之學凡郡邑建置沿革與山川之險

易脉絡畫圖著說縷析條分能補桑鄜所未遺徐乾學修一

統志多用其說

曾志

○薛熙字孝穆游孫永祚汪琬之門肆力古文詞著依歸集謂

遵守歸熙甫法程也選刻明文在百卷

曾志

○陶元淳字子師少英敏過人於三才萬物之理古今因革利

病無不講求精審志欲有為於當世康熙戊辰成進士對策

請減東南財賦詞極剴切主者抑之除廣東昌化知縣始至

逢歲旱徒步禱峻靈山雨立降縣有浮糧賠數百年力請蠲

除不能乃勾稽本末作浮糧考姦民隱苦飛灑愚民重困乃

行清丈法兩年始竣作魚鱗冊剷除公私陋弊作會計經費

錄創立墟市招流亡集商賈禁戢土司加恤窮黎時行村隴

間問民疾苦藹藹如家人父子海外武弁驕橫崖州尤甚元

淳署事三月盡發其姦狀雖遇赦得寢而將吏由此斂戢以

勞卒官邑人尸祝之所著南崖集四卷廣東志十卷明吏傳數卷其制舉文風行海內學者方之金正希陳大士云

陳長志

子貞一字改之性聰悟幼習舉子業即借刻於人為先友何

焯所咨賞康熙壬辰登進士由庶吉士授編修不樂仕進徇

祥里中以卒

○汪繹字玉輪其先自休寧徙常熟康熙丁丑會試第三庚辰

殿試第一授修撰癸未會試同考乞假送親歸乙酉奉

命編校唐詩於揚州明年事竣而卒繹少年高科文詞敏贍書

法秀整而謙退不矜醞藉多風旨臚唱口馬上口占有歸計

詎謀干頃竹浮生只辦十年官之句竟符其言

曾陳二志合纂

○嚴虞惇字寶成兵部主事棧之孫父熊字武伯少為諸生遭

亂棄去縱情詩酒人以比之徐渭虞惇康熙丁丑進士第二

授編修己卯以順天科場事牽連鐫級歸起補國子監丞改

大理寺副遷寺正陞鴻臚少卿歷通政司參議太僕少卿癸

巳主湖廣鄉試榜發以勞致疾卒虞惇自為諸生即以功名

氣節為己任年近五十始登第中遭顛踣浮沈又十餘年在

大理時不肯碌碌署紙尾九門提督陶和氣借通倉盜米案

鍛入其所怨檀張三者欲寘重典虞惇力持不可卒從未減

內務府二格殺無罪者二人傷一人移其事於塾師徐天榮

天榮口吃不能自白承問者考竟成獄法司心知其寃以內

務府故莫敢發聲虞惇方移疾上書本寺少卿邵觀歷指其可疑狀且曰腕可斷題不可畫力疾起出不意執二格訊之遂吐實天榮得釋一時稱其仁且勇典試楚蜀皆稱得人其學根柢經史貫穿三通之書為文典實正大所著詩經質疑詩文集共若干卷

陳志

○陳逢午字方中篤行好學不苟言笑及語道義輒極論終日不倦教子讀書以立行為重曰當知文藝外大有事在所著詩文甚富兼工楷隸

江南通志

○曾倬字漢瞻祖道生字立甫精於三禮父振甲字鷺公少與兄肇甲相切劘以孝友聞順治丁亥成進士除貴溪令未之

任卒倬少孤力學有聲太學康熙己卯舉於鄉兩試禮部後以母老不復往讀書破山寺涵養有得集古人文之不叛於道者為習是編一百十卷修常熟志八卷

陳志

○錢良擇字玉友性倜儻與人交必出肺腑意所不可盡言招過弗顧也游歷幾遍天下所至以詩酒意氣與知名士相結為詩豪放感激有撫雲集選唐詩審體行世同里王譽昌字露潛為諸生攻詩善畫刻苦鍛鍊著崇禎宮詞含星集話山自選若干卷邵陵字青門為詩多發天然格律在睂山劍南間許徹字暘谷詩豐腴工穩有秋樹軒集

陳志

蔣廷錫字揚孫伊仲子少穎敏折節向學負才名康熙己卯

舉順天鄉試癸未下第

特賜進士選庶吉士入直南書房尋授編修遷贊善歷侍講侍讀少詹事擢內閣學士充

經筵講官雍正元年遷禮部右侍郎尋調戶部四年晉尚書主順天鄉試丁母憂起復視事六年拜文華殿大學士仍兼理戶部事加太子太傅充

聖祖實錄及明史總裁官庚戌典會試

特恩加一等輕車都尉世襲卒於位年六十四廷錫當內直時

聖祖方稽古右文

命儒臣編纂羣書每奏

御輒付勘校博學精敏同輩咸推讓 車駕所至皆參扈從備

顧問佐禮部時凡上

尊諡廟號

山陵升祔

郊壇配享諸鉅典廷錫諳練典故參考經籍議上多稱

旨及爲戶部筦三庫與怡賢親王協心一力剷除宿弊部務爲

之肅清明習吏事案牘必親裁西陲用兵軍需調度機政填

委廷錫勇於任事應時立辦無少瞻顧以此最被恩遇所

賜御書扁額曰黼黻絲綸鈞衡碩輔萬幾賢輔他賞賚不可勝

紀及屬疾醫藥勞問之使相望於道病狀日再馳奏訃聞

世宗震悼為輟朝遣大臣臨奠內府庀喪事加祭一壇謚文肅
所著詩有青桐軒集破山集皆少作通籍後多未編錄尤工
寫生神妙與宋元人爭躅性豪爽俸賜數萬金周恤親舊知
交不少吝

賜第外田宅無所增歿後人多思之

張廷玉
撰墓志

孫德威字畏侯知府魯之子博雅而不自炫媒家居食貧嚴
虞惇邀至京時掌院納蘭揆敘被

命有所編纂延致德威凡所撰次皆稱

旨方欲薦聞堅辭而歸著自怡薊門竹西諸橐同邑趙廷珂字
聲倍少游太學工詩歌善書法與太倉吳暲等相倡和大學

士陳廷敬重其才令共校秘館諸書尋以病歸晚精醫術兼
通琴棋行草尤入妙品

○沈淑字立夫祖萬育以孝行旌淑登雍正元年進士選庶吉
士授編修以送親假歸尋卒淑天資過人自幼即能遍讀諸
經註疏宋元儒經解所著有周禮翼疏若干卷時有諸生宋
樂字玉才天才秀挺詩文俱濬發靈府無纖毫俗韻一時老
宿咸斂手讓出頭地二人俱以壯年歿歿無不歎惜者陳志
○瞿駿字雲堦壯歲游京師屢試不遇康熙庚子僅中副榜雍
正五年保舉令下有薦之者

命往河南以知縣用時田雯鏡為總督駿惡其殘酷稱病不赴

命為人狷介有守雖貧甚不肯干人居京師五十年未嘗至貴要之門詩文古淡如其人年七十餘終於僧舍

○陶正靖字穉衷元淳次子雍正庚戌進士選庶吉士授編修乾隆二年改御史遇事敢言時令翰林科道諸臣輪進經史解正靖所撰

上大稱善越次內陞一歲中由鴻臚卿歷右通政左僉都御史尋擢太常卿方謝

恩召對忽忤

旨鐫級歸卒年六十四正靖天資高朗讀書務實用不喜華縟所作古文奏疏雅健條達一時罕及性伉直遇人無粉飾是

非所在盡言招過不顧篤於友誼能赴人之急雖嗜酒好博不拘細行而大節多可取所著晚聞稟詩春秋說共若干卷

○方志貞字端吾小時戲母膝前母撫之曰兒今雖孝有妻子恐不復然卽悚惕不寧及娶孺慕不衰母歿哀毀幾殆夜聞父警欬必起父患痢嘗惡驗味進參苓父憐其貧却之乃爲液雜酒糜中不使知也父老無齒以小罌乞乳於鄰風雨無間父年九十四卒志貞已六十哭之慟亦卒

錢志

○葛光熹支塘傭工也襁褓中喪父母鄰媪抱而育於葛事繼父母盡孝傭工得一壺一鬻必以奉親妻偶失舅姑意遂棄之父歿光熹將賣身買棺鄰里義而助其終事每荷鋤長號

路人爲之感泣又以質春銖積舉先世數棺並葬焉錢志

○張友誠松江人徙常熟早失怙恃顛沛流離始爲人刺舟人愛其誠信乃得婚娶於是遍求父母棺骸不得偶遇一老尼相與敘述乃族姑也爲言當年兩棺借停墻間破屋屋傾樞塌聞墳丁棄骨河干墳丁亦不存矣友誠號哭奔赴其處躍身入水鄉人援救得不死乃刻木爲兩親像飯必祭舉動必告久乃葬其像於北麓廬墓哭泣感動路人曾志

○戴兆箕字傅生與顧鈇顧鏗吳格相友善三人皆貧困兆箕亦止薄田數十畝鈇無子依壻以老格與鏗先歿鏗一子不能娶格惟一女流落爲豪家婢兆箕贖歸配鏗子且分以田

屋鈇聞其事扶病往謝兆箕視其病將不起謂曰子無憂身後也吾妻死製兩棺者爲子地耳未幾鈇歿殮而葬之里黨

咸高其義江南通志

○殷鉉字明遠邑諸生初邑令張燮赦後斂租又增白糧折價鉉父元毓不平以其事聞於總督蠹吏石攻玉吳泰來陳堯夫等與燮合謀誣以罪斃之於獄鉉誓復父讐奔訴督撫燮執鉉拷掠復賄承問李分司者殺以滅口獄方急分司子忽暴亡乃停鞫會鉉僕金恩王科控憲移獄得不死後解金陵與吳泰來同禁將被中傷俄迅雷起空中泰來震死羣兇魄喪獄遂定燮革職擬罪石攻玉斬餘皆流鉉後事母孝母歿

廬墓三年督學魏學誠奏旌其門同邑王松齡亦以孝親

廬墓獲旌

周夢顏殷孝子傳參會志

○程允元字最先年六歲見母病目呼號不食跪母膝上捧母

目舐之人稱為孝童及長鄰火延及父寢父方疾篤冒死從

烈焰中負父出焦爛而卒

曾志

○趙嗣孝字太原常熟人繼伯父世鐸後世鐸歿母陳氏欲殉

嗣孝哀懇母乃緩死後出帶示之曰我欲以此終為汝孝故

得以天年終矣母歿負土築墳廬墓五年後以薦為宗學教


習授青陽教諭陞鹽山知縣未赴得疾卒疾亟時以已田分

給諸弟為鄉里所稱雍正十三年旌表又同邑王予齡呂連

諸生蘇宗芑席永昇孫穀純王樹聲潘滌錢邦憲陳模湯之

仁程永祖方煥先昭文人劉振時李象塚貢生歸復佺王之

鳳景流慶江可禧王尙祐俱雍正乾隆間以孝行旌



蘇州府志卷第六十三

文化乙丑

景况... 蘇州府志卷第六十三... 蘇州府志卷第六十三... 蘇州府志卷第六十三...

